

鄢陵縣志


第四冊
卷十一 人物志一 列傳
卷十二 人物志二 孝友 忠義
文儒苑林

漢書門
九〇八五
一四八
冊架函號類

內閣文庫
九〇八五
一四八
冊架函號類

內閣文庫		
番號	漢	9085
冊數	8	(4)
函號	292	113

共八本



鄆陵縣志卷之十一


人物志一 列傳

淺草文庫

選舉詳而後人物顯鄆陵自縮高孫寶以節義聞
至庾氏代興稱極盛矣唐之知温宋之崔立明之
劉訥皆載在史乘而我

朝之梁熙常翼聖王曰温尤能靖共爾位何莫非

國家深仁厚澤長養而成就者乎舊志人物強為區分
名目太繁而又刪削本傳過于簡畧今悉遵史例
標名列傳其忠孝儒林文苑武功隱逸藝術流寓



列女仍另著于篇志人物一

列傳

戰國

縮高安陵人其子為管守

按通鑑綱目縮高之子仕於秦魏攻管而不

下信陵君使人謂安陵君曰君其遣縮高吾將仕之以五大夫使為持節尉安陵君曰安陵小國也不能必使其民使者自往請使道使者至縮高之所復信陵君之命縮高曰君之幸高也將使高攻管也夫以父攻子守人大笑也

一本作人所大笑

見臣而下是背王也

父教子背亦非君之所喜也敢再拜辭使者以報信陵君信陵君大怒遣大使之安陵曰安陵之地亦猶魏也今吾攻管而不下則秦兵及我社稷必危矣願君之生束縮高而致之若君弗致無忌將發十萬之師以造安陵之城安陵君曰吾先君成侯受詔襄王以守此地也手受大府之憲憲之上篇曰子弑父臣弑君有常不赦國雖大赦降城亡子不得與焉今縮高雖辭大位以全父子之義而君曰必生致之是我負襄王之詔而廢大府之憲也雖死終不敢行縮高

馬陵縣志 卷之十一
聞之曰信陵君爲人悍而自用也此辭反必爲國禍
全已全已無爲人臣之義矣豈可使吾君有魏患也
乃之使者之舍刎頸而死信陵君聞縮高死服縞素
避舍使使謝安陵君曰無忌小人也困於思慮失言
於君敢再拜釋罪

戰國策 省府志入
列傳舊志列節義

西漢

孫寶字子嚴潁川鄆陵人也以明經爲郡吏御史大夫
張忠辟寶爲屬欲令授子經更爲除舍設備侍寶自
劾去忠固還之心內不平後署寶主簿寶徙入舍祭

竈請比鄰忠陰察怪之使所親問寶前大夫爲君設
除大舍子自劾去者欲爲高節也今兩府高士俗不
爲主簿子旣爲之徙舍甚說何前後不相副也寶曰
高士不爲主簿而大夫君以寶爲可一府莫言非士
安得獨自高前日君男欲學文而移寶自近禮有來
學義無往教道不可詘身詘何傷且不遭者可無不
爲况主簿乎忠聞之甚慙上書薦寶經明質直宜備
近臣爲議郎遷諫大夫鴻嘉中廣漢羣盜起選爲益
州刺史廣漢太守扈商者大司馬車騎將軍王音姊

子軟弱不任職寶到部親入山谷諭告羣盜非本造
意渠率皆得悔過自出遣歸田里自劾矯制奏商爲
亂首春秋之義誅首惡而已商亦奏寶所縱或有渠
率當坐者商徵下獄寶坐失死罪免益州吏民多陳
寶功效言爲車騎將軍所排上復拜寶爲冀州刺史
遷丞相司直時帝舅紅陽侯立使客因南郡太守李
尚占墾草田數百頃頗有民所假少府陂澤畧皆開
發上書願以入縣官有詔郡平田予直錢有貴一萬
萬以上寶聞之遣丞相史按驗發其姦劾奏立尚懷

姦罔上狡猾不道尚下獄死立雖不坐後兄大司馬
衛將軍商薨次當代商上度立而用其弟曲陽侯根
爲大司馬驃騎將軍會益州蠻夷犯法巴蜀頗不安
上以寶著名西州拜爲廣漢太守秩中二千石賜黃
金三十斤蠻夷安輯吏民稱之徵爲京兆尹三歲京
師稱之會淳于長敗寶坐免官哀帝卽位徵爲諫大
夫遷司隸上書白尚書僕射鄭崇寃請治尚書令趙
昌帝怒免爲庶人哀帝崩王莽白太后徵寶以爲光
祿大夫平帝立擢爲大司農會越檣郡上黃龍游江

中太師孔光等咸稱莽功德比周公宜告宗廟寶曰
 周公上聖召公大賢尚猶有不相說著于經典兩不
 相損今風雨未時百姓不足每有一事羣臣同聲得
 無非其美者時大臣皆失色侍中奉車都尉甄邯即
 時承制罷議者會寶遣吏迎母母道病留弟家獨遣
 妻子司直陳崇以奏寶事下三公即訊寶對曰年七
 十諄眊恩衰共養營妻子如章寶坐免終於家建武
 中錄舊德臣以寶孫伉為長節前漢書本傳省
義節府志入列傳舊志列

三國魏

庾嶷中正簡素仕魏為太僕散騎常侍蘇林嘗稱為當
 世令器明帝時嘗同劉劭荀詵等定科令作新律十

八篇晉書庾嶷傳參三國志劉劭傳舊志闕

晉

庾峻字山甫潁川鄆陵人也祖乘才學洽聞漢司徒辟
 有道徵皆不就伯父嶷中正簡素仕魏為太僕父道
 廉退貞固養志不仕牛馬有赬齧者恐傷人不償於
 市及諸子貴賜拜大中大夫峻少好學有才思嘗游

京師聞魏散騎常侍蘇林老疾在家往候之林嘗就
乘學見峻流涕良久曰尊祖高才而性退讓慈和汎
愛清靜寡欲不營當世惟修德行而已鄢陵舊五六
萬戶聞今裁有數百君二父孩抱經亂獨至今日尊
伯爲當世令器君兄弟復俊茂此尊祖積德之所由
也歷部功曹舉計掾州辟從事太常鄭袤見峻大奇
之舉爲博士時重莊老而輕經史峻懼雅道陵遲乃
潛心儒典屬高貴鄉公幸太學問尚書義於峻峻援
引師說發明經旨申暢疑滯對答詳悉遷秘書丞長

安有大獄久不決拜峻侍御史往斷之朝野稱允武
帝踐祚賜爵關中侯遷司空長史轉秘書監御史中
丞拜侍中加諫議大夫常侍帝講詩中庶子何劭論
風雅正變之義峻起難往反四坐莫能屈之是時風
俗趨競禮讓陵遲峻上疏言之大要欲旌擢山林之
士及辭寵之臣以厲其廉隅耳峻又疾世爭華不修
名實著論以非之文繁不載九年卒詔賜朝服一具
衣一襲錢三十萬臨終勅子珉朝卒夕殯幅巾布衣
塋勿擇日珉奉遵遺命斂以時服二子珉晉書本
傳其中

奏疏照鄭樵通志節去另編入
藝文珉敦二傳照省志入忠義

庾純字謀南博學有才義爲世儒宗郡補主簿仍叅征南府累遷黃門侍郎封關內侯歷中書令河南尹初純以賈充姦佞與任愷共舉充西鎮關中充由是不平充嘗宴朝士而純後至充謂曰君行常居人前今何以在後純曰且有小市井事不了是以來後世言純之先嘗有伍伯者充之先有市魁者充純以此相譏焉充自以位隆望重意殊不平及純行酒充不時飲純曰長者爲壽何敢爾乎充曰父老不歸供養將

何言也純因發怒曰賈充天下克克由爾一人充曰充輔佐二世蕩平巴蜀有何罪而天下爲之克克純曰高貴鄉公何在衆坐因罷充左右欲執純中護軍羊琇侍中王濟佑之因得出充慙怒上表解職純懼上河南尹關內侯印綬上表自劾求入重罪御史中丞孔恂亦劾之詔免純官又以純父老不求供養使據禮典正其臧否太傅何曾太尉荀顗驃騎將軍齊王攸議曰凡斷正臧否宜先稽之禮律八十者一子不從政九十者其家不從政新令亦如之按純父年

八十一兄弟六人三人在家不廢侍養純不求供養其於禮律未有違也司空公以純備位卿尹望其有加於人而純荒酒肆其忿怒臣以爲純不遠布孝至之行而近惜常人之失應在譏貶司徒石苞議純榮官忘親惡聞格言不忠不孝宜除名削爵土司徒西曹掾劉斌議以爲敦叙風俗以人倫爲先人倫之教以忠孝爲主忠故不忘其君孝故不忘其親若孝必專心於色養則明君不得而臣忠必不顧其親則父母不得而子也是以爲臣者必以義斷其恩爲子也

必以情割其義在朝則從君之命在家則隨父之制然後君父兩濟忠孝各序純兄峻以父老求歸峻若得歸純無不歸之勢峻不得歸純無得歸之理純雖自聞同不見聽近遼東太守孫和廣漢太守鄧良皆有老母良無兄弟授之遠郡辛苦自歸皆不見聽且純近爲京尹父在界內時得自啟定省獨於禮法外處其貶黜斌愚以爲非理也禮年八十一子不從政純有二弟在家不爲違禮又今年九十乃聽悉歸今純父實未九十不爲犯令罵辱宰相宜加放斥以明

國典聖恩愷悌示加貶退臣愚無所清議河南功曹
史龐札亦表言臣郡前尹關內侯純醉酒失常戊申
詔書既免尹官以老篤老不求供養下五府依禮典
正其臧否而羣公有過於責備者遂律尹以爲不孝
謂宜削除爵士臣按令父母年過八十聽令其子不
給限外職誠以得有歸來之緣今尹居在郡內前每
表屢蒙定省尹昆弟六人三人在家孝養不廢兄侍
中峻家之嫡長在比自表求歸供養詔喻不聽國體
法同兄弟無異而虛責尹不求供養如斯臣懼長假

飾之名而損忠誠之實也於是帝復下詔曰自中世
以來多爲貴重順意賤者生情故令釋之定國得揚
名於前世今議責庾純不惟温克醉酒沈湎此責人
以齊聖也疑賈公亦醉終不於百客之中責以不去
官供養也大晉依聖人典禮制臣子出處之宜若有
八十皆當歸養亦不獨純也古人云由醉之言俾出
童叟明不責醉恐失度也所以免純者當爲將來之
醉戒耳齊王劉掾議當矣復以純爲國子祭酒加散
騎常侍後將軍荀販於朝會中奏純以前坐不孝免

黜不宜升進侍中甄德進曰孝以顯親為大祿養為榮詔赦純前愆擢為近侍兼掌教官此純召不俟駕之日而後將軍販敢以私議貶奪公論抗言矯情誣罔朝廷宜加貶黜販坐免官初販與純俱為大將軍所辟販整麗車服純率素而已販以為愧恨至是毀純販既免黜純更以此愧之亟往慰勉之時人稱純通恕遷侍中以父憂去官起為御史中丞轉尚書除魏郡太守不之官拜少府年六十四卒子勇

晉書本傳刪節

照鄭樵通志 省府志 入列傳舊志列名德

庾勇字允臧少有清節歷位博士齊王攸之就國也下禮官議崇錫之物勇與博士太叔廣劉暉繆蔚郭頤秦秀傅珍等上表諫曰書稱帝堯克明峻德以親九族武王光有天下兄弟之國十有六人同姓之國四十人元勳睦親顯以殊禮而魯衛齊晉大啓土宇並受分噐所謂惟善所在親疎一也大晉龍興隆唐周之遠跡王室親屬佐命功臣咸受爵土而四海乂安今吳會已平詔大司馬齊王出統方嶽當遂撫其國家將準古典以垂永制昔周之選建明德以左右王

室也則周公爲太宰康叔爲司寇聃季爲司空及召
芮畢毛諸國皆入居公卿大夫之位明股肱之任重
守地之位輕也未聞古典以三事之重出之國者漢
氏諸侯王位尊勢重在丞相三公上其入讚朝政者
乃有兼官其出之國亦不復假台司虛名爲隆寵也
昔申無宇曰五大不在邊先儒以爲貴寵公子公孫
累世正卿也又曰五細不在庭先儒以爲賤妨貴少
陵長遠間親新聞舊小加大也不在庭不在朝廷爲
政也又曰親不在外羈不在內今棄疾在外鄭丹在

內君其少戒之叔向有言公室將卑其枝葉先落公
族公室之本而去之諺所謂芘焉而縱斧柯者也
今使齊王賢邪則不宜以母弟之親尊居魯衛之常
職不賢邪不宜大啓土宇表建東海也古禮三公無
職坐而論道不聞以方任嬰之惟周室大壤宣王中
興四夷交侵救急朝夕然後命召穆公征淮夷故其
詩曰徐方不回王曰旋歸宰相不得久在外也今天
下已定六合爲家將數延三事與論太平之基而更
出之去玉城二千里違舊章矣莠草議先以呈父純

純不禁太常鄭默博士祭酒曹志並過其事武帝以
博士不答所問答所不問大怒事下有司尚書朱整
褚碧等奏專等侵官離局迷罔朝廷崇飾惡言假託
無諱請收專等八人付廷尉科罪專父純詣廷尉自
首專以議草見示愚淺聽之詔免純罪廷尉劉頌又
奏專等大不敬棄市論求平議尚書又奏請報聽廷
尉行刑尚書夏侯駿謂朱整曰國家乃欲誅諫臣官
立八座正爲此時卿可共駁正之整不從駿怒起曰
非所望也乃獨爲駁議左僕射魏舒右僕射下邳王

晃等從駿議奏留中七日乃詔曰專等備爲儒官不
念奉憲制不指答所問敢肆其誣罔之言以干亂視
聽而專是議主應爲戮首但專及家人並自首大信
不可奪秦秀傅珍前者虛妄幸而得免復不以爲懼
當加罪戮以彰凶慝猶復不忍皆丐其死命秀珍專
等並除名後數歲復起爲散騎侍郎終于國子祭酒

見晉書庾純傳 省府
志入列傳舊志列名德

庾琮字子躬太常峻之第二子仕至太尉掾子躬有廢
疾而甚知名於時其家在城西故號曰城西公府其

弟卽敦也王長史

王氏譜漾父訥娶庾琮之女字三壽

是子勳外孫丞

相王導日子躬云入理泓然我已上人

見晉書叅世說

庾琛字子美明穆皇后父也永嘉初為建威將軍過江

為會稽太守徵為丞相軍諮祭酒卒官以后父追贈

左將軍咸和中成帝又下詔追贈琛驃騎將軍儀同

三司亮又辭焉

晉書外戚傳

庾亮字元規明穆皇后之兄也父琛在外戚傳亮美姿

容善談論性好莊老風格峻整動由禮節閨門之內

不肅而成時人或以為夏侯太初陳長文之倫也年

十六東海王越辟為掾不就隨父在會稽嶷然自守

時人皆憚其方儼莫敢造之元帝為鎮東時聞其名

辟西曹掾及引見風情都雅過於所望甚器重之由

是聘亮妹為皇太子妃亮固讓不許轉丞相叅軍預

討華軼功封都亭侯轉叅丞相軍事掌書記中興初

拜中書郎領著作侍講東宮其所論釋多見稱述與

溫嶠俱為太子布衣之好時帝方任刑法以韓子賜

皇太子亮諫以申韓刻薄傷化不足留聖心太子甚

納焉累遷給事中黃門侍郎散騎常侍時王敦在蘇

湖帝使亮詣敦籌事敦與亮談論不覺改席而前退而歎曰庾元規賢於裴頠遠矣因表爲中領軍囑帝卽位以爲中書監亮上書讓帝納其言而止王敦旣有異志內深忌亮而外崇重之亮憂懼以疾去官復代王導爲中書監及敦舉兵加亮左衛將軍與諸將距錢鳳及沈充之走吳興也又假亮節都督東征諸軍事追充事平以功封永昌縣開國公賜絹五千四百匹固讓不受轉護軍將軍及帝疾篤不欲見人羣臣無得進者撫軍將軍南頓王宗右衛將軍虞胤等

素被親愛與西陽王羨將有異謀亮直入卧內見帝流涕不自勝旣而正色陳羨與宗等謀廢大臣規共輔政社稷安否將在今日辭旨切至帝深感悟引亮升御座遂與司徒王導受遺詔輔幼主加亮給事中徙中書令太后臨朝政事一決於亮先是王導輔政以寬和得衆亮任法裁物頗以此失人心又先帝遺詔褒進大臣而陶侃祖約不在其列侃約疑亮刪除遺詔並流怨言亮懼亂於是出温嶠爲江州以廣聲援修石頭城以備之會南頓王宗復謀廢執政亮殺

宗而廢宗兄羨宗帝室近屬美國族元老又先帝保
傅天下咸以亮翦削宗室琅琊人卞咸宗之黨也與
宗俱誅咸兄闡亡奔蘇峻亮符峻送闡而峻保匿之
峻又多納亡命專用威刑亮知峻必爲禍亂徵爲大
司農舉朝謂之不可平南將軍溫嶠亦累書止之皆
不納峻遂與祖約俱舉兵反溫嶠聞峻不受詔便欲
下衛京都三吳又欲起義兵亮並不聽而報嶠書曰
吾憂西郵過于歷陽足下無過雷池一步也旣而峻
將韓晃寇宣城亮遣距之不能制峻乘勝至于京都

詔假亮節都督征討諸軍事戰于建陽門外軍未及
陣士衆棄甲而走亮乘小船西奔亂兵相剝掠亮左
右射賊誤中施工應弦而倒船上咸失色欲散亮不
動容徐曰此手何可使著賊衆心乃安亮携其三弟
懌條翼南奔溫嶠嶠素欽重亮雖在奔敗猶欲推爲
都統亮固辭乃與嶠推陶侃爲盟主侃至尋陽旣有
憾於亮議者咸謂侃欲誅執政以謝天下亮甚懼及
見侃引咎自責風止可觀侃不覺釋然乃謂亮曰君
侯修石頭以擬老子今日反見求耶便談宴終日亮

噉薤因留侃問曰安用此爲亮云故可以種侃於是尤相稱歎云非惟風流兼有爲政之實旣至石頭亮遣督護王彰討峻黨張曜反爲所敗亮送節傳以謝侃侃答曰古人三敗君侯始二當今事急不宜數耳又曰朝政多門用生國禍喪亂之來豈獨由峻也亮時以二千人守白石壘峻步兵萬餘四面來攻衆皆震懼亮激厲將士並殊死以戰峻軍乃走追斬數百級峻平帝幸温嶠舟亮得進見稽顙頓首詔羣臣與亮俱升御座亮明日又泥首謝罪乞骸骨欲闕門

投竄山海帝遣尚書侍中手詔慰喻此社稷之難非舅之責也亮上疏謝罪優詔答之亮又欲遁逃山海自暨陽東出詔有司錄奪舟船亮乃求外鎮自効出爲持節都督豫州揚州之江西宣城諸軍事平西將軍假節豫州刺史領宣城内史亮遂受命鎮蕪湖頃之後將軍郭默據湓口以叛亮表求親征於是以本官加征討都督率將軍路永毛寶趙胤匡術劉仕等步騎二萬會太尉陶侃俱討破之亮還蕪湖不受爵賞侃移書曰夫賞罰黜陟國之大信竊怪矯然獨爲

君子亮曰元帥指撝武臣効命亮何功之有遂苦辭不受進號鎮西將軍又固讓初以誅王敦功封永昌縣公亮比陳讓疏數十上至是許之陶侃薨遷亮都督江荆豫益梁雍六州諸軍事領江荆豫三州刺史進號征西將軍開府儀同三司假節亮固讓開府乃遷鎮武昌時石勒新死亮有開復中原之謀乃解豫州授輔國將軍毛寶使與西陽太守樊峻精兵一萬俱戍邾城又以陶稱為南中郎將江夏相率部曲五千人入沔中亮弟翼爲南蠻校尉南郡太守鎮江陵

以武昌太守陳囂爲輔國將軍梁州刺史趣子午又遣偏軍伐蜀至江陽執僞荊州刺史李閔巴郡太守黃植送于京都亮當率大衆十萬據石頭城爲諸軍聲援郗鑒議以資用未備不可大舉亮又上疏便欲遷鎮會寇陷邾城毛寶赴水而死亮陳謝自貶三等行安西將軍有詔復位尋拜司空餘官如故固讓不拜亮自邾城陷沒憂慨發疾會王導薨徵亮爲司徒揚州刺史錄尚書事又固辭帝許之咸康六年薨時年五十二追贈太尉諡曰文康喪至車駕親臨及葬

又贈永昌公印綬亮弟冰上疏陳兄志不受帝從之
亮將葬何充會之歎曰埋玉樹于土中使人情何能
已初亮所乘馬有的顛殷浩以為不利於主勸亮賣
之亮曰曷有已之不安而移之於人浩慙而退亮在
武昌諸佐吏殷浩之徒乘秋夜往共登南樓俄而不
覺亮至諸人將起避之亮徐曰諸君少住老子於此
處興復不淺便據胡床與浩等談詠竟坐其坦率行
已多此類也三子彬羲儼彬世說作會庾氏譜曰彬
字會宗年十九咸和六
年遇年數歲雅量過人温嶠嘗隱暗怛之彬神色恬
害

如也乃徐跪謂嶠曰君侯何至於此論者謂不減於

亮蘇峻之亂遇害義

徐廣晉紀
義字叔和

少有時譽初為吳興

內史時穆帝頗愛文義義至郡獻詩頗存諷諫因上
表其詩文多不載義方見授用而卒子準太元中自
侍中代桓石虔為豫州刺史西中郎將鎮歷陽卒官
準子悅義熙中江州刺史準弟楷自有傳儼字道季
好學有文章叔父翼將遷襄陽儼年十五以書諫止
翼甚竒之升平中代孔嚴為丹陽尹表除重役六十
餘事太和初代王恪為中領軍卒於官子恒尚書僕

射贈光祿大夫

節晉書本傳 省府志 人列傳舊志列經濟

庾懌字叔預少以通簡爲兄亮所稱弱冠西陽王羨辟不就東海王冲爲長水校尉清選綱紀以懌爲功曹除暨陽令又爲冲中軍司馬轉散騎侍郎遷左衛將軍以討蘇峻功封廣饒男出補臨川太守歷監梁雍二州軍事轉輔國將軍梁州刺史假節鎮魏興時兄亮總統六州以懌寬厚容衆故授以遠任爲東西勢援尋進監秦州氏羌諸軍事懌遣牙門霍佐迎將士妻子佐驅三百餘口亡入石季龍亮表上貶懌爲建

威將軍朝議欲召還亮上疏曰懌御衆簡而有惠州戶雖小賴其寬政佐等同惡大數不多且懌名號大不可以小故輕議進退其文武之心轉已安定賊帥艾秀遣使歸誠上洛附賊降者五百餘口冀一安隱無復怵惕從之後以所鎮險遠糧運不繼詔懌以將軍率所領還屯半洲尋遷輔國將軍豫州刺史進號西中郎將監宣城廬江歷陽安豐四郡軍事假節鎮蕪湖懌嘗以白羽扇獻成帝帝嫌其非新反之侍中劉劭曰栢梁雲構大匠先居其下管弦繁奏夔牙先

聆其音憚之上扇以好不以新後憚聞之曰此人宜
 在帝之左右卒年五十贈侍衛將軍諡曰簡子統嗣
 統字長仁少有令名司空大尉辟皆不就調補撫軍
 會稽王司馬出為建威將軍寧夷護軍尋陽太守年
 二十九卒時人稱其才器甚痛惜之子玄之官至宣

城內史

節晉書庾亮傳 省府志入列傳舊志列名德

庾冰字季堅兄亮以名德流訓冰以雅素垂風諸弟相
 率莫不好禮為世論所重亮常以為庾氏之寶司徒
 辟不就徵秘書郎預討華軼功封都鄉侯王導請為

司徒右長史出補吳興內史會蘇峻作逆遣兵攻冰
 冰不能禦便棄郡奔會稽會稽內史王舒以冰行奮
 武將軍距峻別率張健於吳中時健黨甚眾諸將莫
 敢先進冰率眾擊健走之於是乘勝西進赴于京都
 又遣司馬滕含攻賊石頭城拔之冰勲為多封新吳
 縣侯固辭不受遷給事黃門侍郎又讓不拜司空郗
 鑒請為長史不就出補振威將軍會稽內史徵為領
 軍將軍又辭尋入為中書監揚州刺史都督揚豫兗
 三州軍事征虜將軍假節是時王導新喪人情恹然

水兄亮既固辭不入衆望歸水既當重任經綸時務不捨晝夜賓禮朝賢升擢後進由是朝野注心咸曰賢相初導輔政每從寬惠水頗任威刑殷融諫之水曰前相之賢猶不堪其弘况吾者哉范汪謂水曰頃天文錯度足下宜盡消禦之道水曰玄象豈吾所測正當勤盡人事耳又隱實戶口料出無名萬餘人以充軍實成帝疾篤時有妄爲中書符勅宮門宰相不得前左右皆失色水神氣自若曰是必虛妄推問果詐衆心乃定進號左將軍康帝卽位又進車騎將軍

水懼權盛乃求外出會弟翼當伐石季龍於是以本號除都督江荆寧益梁交廣七州豫州之四郡軍事領江州刺史假節鎮武昌以爲翼援臨發上疏頗盡忠益頃之獻皇后臨朝徵水輔政水辭以疾篤尋而卒時年四十九冊贈侍中司空諡曰忠成祠以太牢水天性清慎常以儉約自居中子襲嘗貸官絹十匹水怒捶之市絹還官臨卒謂長史江彪曰吾將逝矣恨報國之志不展命也如何死之日歛以時服無以官物也及卒無絹爲衾又室無妾媵家無私積世以

此稱之冰七子希襲友蘊倩邈柔希字始彥初拜祕書郎累遷司徒右長史黃門侍郎建安太守未拜復爲長史兼右衛將軍遷侍中出爲輔國將軍吳國內史希旣后之戚屬冰女又爲海西公妃故希兄弟並顯貴太和中希爲北中郎將徐兗二州刺史蘊爲廣州刺史並假節友東陽太守倩太宰長史邈會稽王叅軍柔散騎常侍倩最有才器桓温深忌之初慕容厲圍梁父斷澗水太山太守諸葛攸奔鄒山魯高平等數郡皆没希坐免官頃之徵爲護軍將軍希怒固

辭希初免時多盜北府軍資温諷有司劾之復以罪免遂客於晉陵之暨陽初郭璞筮冰云子孫必有大禍唯用三陽可以有後故希求鎮山陽友爲東陽家于暨陽及海西公廢桓温陷倩及柔以武陵王黨殺之希聞難便與弟邈及子攸之逃于海陵陂澤中蘊於廣州飲鴆而死及友當伏誅友子婦桓祕女也請温故得免故青州刺史武沉希之從母兄也潛餉給希經年温後知之遣兵捕希武沉之子遵與希聚衆于海濱畧漁人船夜入京口城平北司馬卞耽踰城

奔曲阿吏士皆散走希放城內囚徒數百人配以器
杖遵於外聚衆宣令云逆賊桓温廢帝殺王稱海西
公密旨除凶逆京都震擾內外戒嚴屯備六門平北
叅軍劉夔與高平太守郗逸之遊軍督護郭龍等集
衆距之卞耽又與曲阿人弘戎發諸縣兵二千并力
屯新城以擊希希戰敗閉城自守温遣東海太守周
少孫討之城陷被擒希邈及子姪五人斬于建康市
遵及黨與並伏誅唯友及蘊諸子獲全友子叔宣右
衛將軍蘊子廓之東陽太守

節晉書庾亮傳 省府志入列傳舊志入名德

庾條字幼序初辟太宰府累遷黃門郎豫章太守徵拜
祕書監賜爵鄉亭侯出爲冠軍將軍臨州太守豫章
黃韜自稱孝神皇帝臨川人李高爲相聚黨數百人
乘犢車衣皂袍攻郡縣條討平之條於兄弟最凡劣
故祿位不至卒官贈左將軍

晉書庾亮傳 舊志闕

庾翼字稚恭風儀秀偉少有經綸大畧京兆杜乂陳郡
殷浩並才名冠世而翼弗之重也每語人曰此輩宜
束之高閣俟天下太平然後議其任耳見桓温總角
之中便期之以遠畧因言于成帝曰桓温有英雄之

才願陛下勿以常人遇之常壻畜之宜委以方邵之任必有弘濟艱難之勲蘇峻作逆翼時年二十二兄亮使白衣領數百人備石頭亮敗與翼俱奔事平始辟太尉陶侃府轉參軍累遷從事中郎在公府雍容諷議頃之除振威將軍鄱陽太守轉建威將軍西陽太守撫和百姓甚得歡心遷南蠻校尉領南郡太守加輔國將軍假節及邾城失守石城被圍翼屢設奇兵潛致糧仗石城得全翼之勲也賜爵都亭侯及亮卒授都督江荆司雍梁益六州諸軍事安西將軍荆

州刺史假節代亮鎮武昌翼以帝舅年少超居大任遐邇屬目慮其不稱翼每竭志能勞謙匪懈戎政嚴明經畧深遠數年之中公私充實人情翕然稱其才幹由是自河以南皆懷歸附石季龍汝南太守戴開率數千人詣翼降又遣使東至遼東西到涼州要給二方欲同大舉慕容皝張駿並報使請期翼雅有大志欲以滅寇平蜀爲己任言論慷慨形于辭色將兵都尉錢頡陳事合旨翼拔爲五品將軍賜穀二百斛時東土多賦役百姓乃從海道入廣州刺史鄧嶽大

開鼓鑄諸夷因此知造兵器翼表陳東境國家所資
侵擾不已逃逸漸多夷人常伺隙若知造鑄之利將
不可禁時殷浩徵命無所就而翼請爲司馬及軍司
並不肯赴翼遺浩書因致其意先是浩父羨爲長沙
在郡貪殘兄冰與翼書屬之翼報書去之康帝卽位
翼欲率衆北伐上疏於是並發所統六州奴及車牛
驢馬百姓嗟怨時欲向襄陽慮朝廷不許故以安陸
爲辭帝及朝士皆遣使譬止車騎參軍孫綽亦致書
諫翼不從遂違詔輒行至夏口復上表言進退之策

翼時有衆四萬詔加都督征討軍事師次襄陽大會
僚佐陳旌甲親授弧矢曰我之行也若此射矣遂三
起三疊徒衆屬目其氣十倍初翼遷襄陽舉朝謂之
不可議者或謂避衰唯兄冰意同桓温及譙王無忌
贊成其計至是冰求鎮武昌爲翼繼援朝議謂冰不
宜出冰乃止又進翼征西將軍領南蠻校尉賊五六
百騎出樊城翼遣冠軍將軍曹據追擊於撓溝北破
之死者近半獲馬百匹翼綏來荒遠務盡招納之宜
立客館置典賓參軍桓宣卒翼以長子方之爲義城

太守代領宣衆康帝崩兄冰卒以家國情事留方之
 戍襄陽還鎮夏口悉取水所領兵自配以兄子統爲
 尋陽太守詔使翼還督江州又領豫州刺史辭豫州
 復欲移鎮樂鄉詔不許繕修軍器大佃積穀欲圖後
 舉遣益州刺史周撫西陽太守曹據伐蜀破蜀將李
 桓於江陽翼如廁見一物如方相俄而疽發背疾篤
 表第二子爰之行輔國將軍荊州刺史永和元年卒
 時年四十一追贈車騎將軍諡曰肅翼卒未幾部將
 于瓚戴羲等作亂殺將軍曹據翼長史江彪司馬朱

燾將軍袁真等共誅之爰之

世說註庾氏譜曰爰之字仲真中興書爰之年

三十有翼風等爲桓温所廢温既廢爰之又以征虜

將軍劉惔監沔中軍事領義成太守代方之而方之

爰之竝遷徙于豫章

節晉書庾亮傳省府志入列傳舊志列經濟

南北朝

庾悅字仲豫潁川鄢陵人也曾祖亮晉太尉祖義吳國
 內史父淮西中郎將豫州刺史悅仕晉爲司徒右長
 史桓玄篡位爲中書侍郎宋武平建鄴累遷中軍司
 馬從征廣固竭其誠力盧循逼京師以悅督江豫司

三州之六郡軍事建威將軍江州刺史悅敗循兵于五畝橋進據豫章斷循糧援初劉毅家在京口酷貧嘗與鄉曲士大夫往東堂共射時悅為司徒右長史要府州僚佐出東堂毅已先至遣與悅相聞曰身竝貧躓營一遊甚難君如意人無處不可為適豈不能以此堂見讓悅素豪徑前不答毅時衆人竝避唯毅留射如故悅厨饌甚盛不以及毅毅既不去悅甚不歡毅又相聞曰身今年未得子鵝豈能以殘炙見惠悅又不答至是毅表解悅都督將軍官以刺史移鎮

豫章以親將趙恢領千兵守尋陽建威府文武三千人悉入毅將府深相挫辱悅不得志疽發背到豫章少日卒追贈征虜將軍以廣固功追封新陽縣五等

男

宋書本傳參南史 按晉書庾亮傳三子彬羲猷而無義義子準而無淮然宋書南史及鄭樵通志

皆譌作義與淮諒亦有據故仍之 舊志列經濟

庾登之字元龍悅族弟也曾祖冰晉司空祖蘊廣州刺史父廓東陽太守登之少以疆濟自立初為宋武帝鎮軍參軍預計桓立功封曲江縣五等男累遷新安太守謝晦為荊州刺史請為長史南郡太守仍為衛

焉
卷之十一
軍長史登之與晦俱曹氏壻名位本同一旦爲之佐
意甚不愜到廳牋唯言卽日恭到初無感謝之言每
入覲見備持箱囊几席之屬一物不具則不肯坐嘗
於晦坐誦西征賦云生有修短之命位有通塞之遇
晦雖恨而嘗優容之晦拒王師欲登之留守登之不
許晦敗登之以無任免官禁錮還家何承天戲之曰
因禍爲福未必可知登之曰我亦幾與三豎同戮承
天爲晦作表云當浮舟東下戮此三豎故登之爲嘲
後爲司徒長史南東海太守府公彭城王義康專覽

政事不欲自下厝意而登之性剛每陳己志義康不
悅出爲吳郡太守以贓貨免官後拜豫章太守徵爲
中護軍未拜卒子仲遠初爲宋明帝府佐廢帝景和
中明帝疑防賓客故人無到門者唯仲遠朝謁不替
明帝卽位謂曰卿所謂疾風知勁草自軍錄事叅軍
擢拜太子中庶子卒於豫章太守贈侍中登之弟仲

文

南史本傳 省府志
入列傳舊志列名德

庾炳之字仲文位廣平太守兄登之爲謝晦長史炳之
往省之時晦權重朝士竝加敬炳之獨與抗禮後爲

彭城王義康驃騎主簿未就徙爲丹陽丞旣未到府疑於府公禮敬下禮官博議中書侍郎裴松之議曰案春秋桓公八年祭公逆王后于紀公羊傳曰女在國稱女此其稱王后何王者無外其辭成矣推此而言則炳之爲吏之道定於受敕之日矣名器旣正則禮亦從之安可以未到廢其節乎宜執吏禮從之後始與王濬當鎮湘州以炳之爲司馬濬不之任仍除南梁太守司馬如故于時領軍劉湛協附大將軍彭城王義康而與僕射殷景仁隙凡朝士遊殷氏者不得入劉氏之門獨炳之遊二人間密盡忠於朝廷景仁稱疾不朝見者歷年文帝常令炳之銜命去來湛不疑也義康出藩湛伏誅以炳之爲尚書吏部郎與右衛將軍沈演之俱叅機密歷侍中吏部尚書領義陽王師內外歸附勢傾朝野炳之爲人強急不耐煩賓客訢非理者忿罵形於辭色素無術學不爲衆望所推性好潔士大夫造之者未出戶輒令人拭席洗牀時陳郡殷冲亦好潔小史非淨浴新衣不得近左右士大夫小不整潔每容接之炳之好潔反是每以

得入劉氏之門獨炳之遊二人間密盡忠於朝廷景仁稱疾不朝見者歷年文帝常令炳之銜命去來湛不疑也義康出藩湛伏誅以炳之爲尚書吏部郎與右衛將軍沈演之俱叅機密歷侍中吏部尚書領義陽王師內外歸附勢傾朝野炳之爲人強急不耐煩賓客訢非理者忿罵形於辭色素無術學不爲衆望所推性好潔士大夫造之者未出戶輒令人拭席洗牀時陳郡殷冲亦好潔小史非淨浴新衣不得近左右士大夫小不整潔每容接之炳之好潔反是每以

此見譏領選既不緝衆論又頗通貨賄用少府卿劉道錫爲廣州刺史道錫至鎮餉白檀牽車常自乘焉或以白文帝帝見問曰道錫餉卿小車裝飾甚麗有之乎炳之懼起謝又炳之請急還家吏部令史錢泰主客令史周伯齊出炳之宅諮事泰能彈琵琶伯齊善歌炳之因留停宿尚書制令史諮事不得宿停外雖八座命亦不許爲有司所奏上於炳之素厚將恕之召問尚書右僕射何尚之具陳炳之得失深劾之帝可其奏乃免炳之官卒于家帝錄其宿誠追贈本

官子二季遠弘遠弘遠字士操有士譽仕齊爲江州長史刺史陳顥達舉兵敗斬於朱雀航將刑索帽著之曰子路結纓吾不可以不冠而死謂看者曰吾非賊乃是義兵爲諸君請命爾陳公太輕事若用吾言天下將免塗炭弘遠子子曜年十四抱持父乞代命遂併殺之炳之從弟徽之位御史中丞徽之子漪齊邵陵王記室漪子仲容

節南史本傳
舊志附登之傳

唐

崔知溫字體仁許州鄆陵人祖樞司農卿父義真陝州

馬陽縣志 卷之十一 三
刺史知溫仕爲左千牛稍遷靈州司馬境有渾斛薩
萬帳數擾齊民農皆釋耒習騎射以扞賊知溫表徙
河北斛薩不樂遷將軍契苾何力爲言乃止知溫固
請疏十五報卒徙河北自是人得就耕渾斛薩至徙
地顧善水草亦忘遷後入朝過州謝曰初徙且怨公
今地膏腴衆孳夥更荷公恩皆再拜四遷蘭州刺史
党項羌三萬入寇州兵寡衆懼莫知所出知溫披闔
不設備羌怪之不敢進俄會將軍權善才率兵至大
破其衆善才欲遂窮追取之知溫曰古善戰弗逆奔

且谿谷複深草木荒延萬分一有變不可悔善才曰
善分降口五百贈知溫辭曰我議公事圖私利邪累
遷尚書左丞轉黃門侍郎修國史永隆初以秩卑特
詔同門下三品兼修國史遷中書令卒年五十七贈
幽州大都督諡曰忠子泰之開元時爲工部尚書諤
之爲將作少匠與誅二張功封博陵縣侯實封戶二
百終少府監兄知悌亦至中書侍郎與戴至德郝處
俊李敬玄等同賜飛白書贊而知悌敬玄以忠勤見
表遷尚書左丞裴行儉之坡突厥斬泥孰匄殘落保

狼山詔知悌馳往定襄慰將士佐行儉平道寇有功

終戶部尚書

唐書本傳參弘簡錄省府志入列傳舊志列經濟

五代周

崔周度鄢陵人父光表後唐同光初舉進士為天下第一終右補闕直史館周度性忠鯁敢言周初為兗州節度判官其帥慕容彥超叛以大義譬責之復諫曰魯詩書之國也自伯禽以來未有能霸者然以禮義得之而長世者多矣今公英武一代之豪傑也若量力相時而動可以保富貴而終身李河中安襄陽鎮

陽杜令公近歲之龜鑑也不聽卒為其所害周祖聞而傷之贈祕書少監

採五代史慕容彥超傳參韓魏公安陽集舊志闕

宋

袁逢吉字延之鄢陵人曾祖儀仕唐以軍功至黃州刺史祖光甫尉氏令父蟾大理評事逢吉四歲能誦爾雅孝經七歲兼通論語尚書周太祖召試賞其精習賜束帛開寶八年擢三傳第釋褐清江尉知州王明薦其能就除豐城令運使張去華條上治狀召為春秋博士淳化中累遷至水部郎中呂蒙正薦其經術

宜任學官會蜀叛授西川轉運使至道初徙荆湖北
路憚遠不赴罷知夔州川陝採訪使上其治迹與朱
協李虛已薛顏邵暉查道劉檢同賜褒諭祥符中歷
官鴻臚少卿卒年六十九逢吉性修謹練達時務鄆
州牧馬草地侵民田數百頃牒訴連不決命逢吉按
視至則悉還所侵田民咸德之兄及甫歷京東峽路
轉運使至駕部郎中子成務比部員外郎京東轉運
副使從子楚材至虞部員外郎

弘簡錄本傳 省志
入列傳府志同舊志

列經
濟

崔立字本之開封鄆陵人祖周度仕周爲泰寧軍節度
判官慕容彥超叛責以大義見殺立登進士爲果州
團練推官役兵輦官物因道險率衆錢傭舟載還真
宗記之改大理寺丞知安豐軍大水壞期斯塘躬督
繕治進殿中丞歷通判廣許二州提舉滑州決河調
民出芻槌計其用有餘而下戶未輸者尙二百萬悉
奏弛之權知江陰軍屬縣港堰久廢教民濬治溉田
數千頃開橫河六十里疏通漕運太常少卿歷知棣
漢相潞堯鄆涇七州堯歲大饑募富人出穀賑餓者

全活甚衆立天性淳謹兼有識見能知人韓琦尙爲
布衣以女妻之亦喜論事尤不肯言符瑞祥符間前
後凡上四十餘事言徐州大水江淮連旱無爲州烈
風金陵火此皆天所以警驕惰戒淫佚也時論躉之
以右諫議大夫知耀州改知濠州遷給事中進工部
侍郎致仕卒宋史本傳 省志入列傳
崔愈字士先立之子天聖間以明經登第官至尙書駕
部郎中上柱國賜紫金魚袋政績著聞范仲淹杜衍
交薦之議遷監司而愈力請治郡詳見李昭玘所撰

墓文

府志入列傳
舊志列名德

明

于潛字彥昭少倜儻有志操洪武初以明經釋褐太學
薦才能除監察御史改五軍都督府斷事歷知隆德
昌樂縣清介勤敏得吏民心累陞建昌知府終應天
府尹省志入列傳府志
同舊志列名德
程敏字彥章醇篤好學謙恭不伐洪武間以貢生除前
軍都督府斷事調刑部主事讞獄精詳累陞廣東左

叅政

省志入列傳
舊志入名德

盧士達洪武二十三年由孝廉任萊陽縣丞治行卓異

陞福建道監察御史風裁尤著

舊志入名德

呂謙字子端少為吏性廉謹洪武間知休寧縣不受民

贄謁調知狄道地近西鄙民有告軍衛占田者歲逋

稅謙奏令衛官卒代輸民賴以蘇歷陞工部主事刑

部郎中提督安置畿內軍民事竣陞九江知府

舊志入名德

德

鄭俊中永樂癸未鄉試除工部主事雅有名績

舊志入名德

張睿字志通宣德己酉中河南鄉試第三名明年登進

士授吏科給事中歷陞都給事中戶部左右侍郎尚

書奉勅監督京通糧儲正統己巳敵騎薄京朝廷恐

通儲資敵數勅焚之睿度時審勢矯旨存糧芻以億

萬計天順六年禮部尚書石琚自陳上諭大學士李

賢曰戶部侍郎張睿可代賢曰睿老成人此職亦宜

會琚仍留上令中官傳旨睿歷任年久辦事勤勞陞

戶部尚書仍管糧儲命下士論重之載天順日錄睿

嘗摘誥詞公廉平恕四字扁以自勵致仕卒詔祭葬

如例子紡補廕入國學孫瑜曾孫時興俱舉人

省志入列傳

傳舊志
列經濟

李讓天順間以貢生任河間知縣野無游民庭無滯訟
勢力者來輒身任之不以困民民之就役者為立科
條使更休迭逸而毋告瘁邑有巨猾置于法者前後
數十人其請老而歸也貧無以資士民挽留者以千
計既弗獲命相率出泉布贖之一無所受行之日阻
道為塞有泣下者古所謂循吏若鄢陵李君非耶

見程

皇墩文集
舊志闕

夏昂字文端少警敏力學事母以孝聞天順壬午試吏

部優等除保定通判廉直清勤修舉馬政馬益蕃息
成化初出師討賊協濟有功嘗設法擒劇賊數辯誣
服死刑軍民戴之九年考績陞本府同知致仕年八

十二卒

舊志入
名德

程鶴字大鴻少厲志苦學每讀三鼓方寢以鄉貢入太
學所交皆天下名士屢試禮部不第乃循資就銓考
第一得大夫同知青州府事尋以憂去復補贛州剛
正廉明譽孚上下再調嘉興以疾卒于官其壻劉訥
為撰貽休永祀碑立塋左

舊志入
名德

牛理字原道天順間以貢任順義知縣縣屬畿內多豪
 右難治理任九年清勤自矢庭鮮疑獄民多畏志致
 仕家居不入城市里有忿爭者平之貧乏者賙之庶
 幾古所謂鄉先生沒而可祭于社者也子緩成化辛
 卯舉人除南京都察院司務歷陞刑部員外郎郎中
 兩浙運司同知致仕進階亞中大夫課子耕讀絕跡
 公府有司時加存問善吟詠著有菊坡小稿舊志入名德
 胡璣字世重初選鴻臚寺序班明習朝儀出補華亭丞
 治聲甚籍歸老教子力學好善嘗取孟子求仁強恕

之意自號近齋年九十三卒子東魯字望之正德癸
 酉舉人除禮部司務累官四川叅議所至皆以循績

著舊志入名德傳

魏璋字廷圭成化乙未進士初除武進知縣惠綏善良
 摧抑豪右治績頓著陞福建道監察御史彈劾不避
 權要巡按廬鳳淮揚奏開古芍陂溉田惠民丁內艱
 復除浙江道陞大理寺左寺丞以直道忤時調九江
 府同知致仕卜居南莊杜門不出嚴寒溽暑手不釋
 卷晚年著錄見編未脫稿卒子訥省志入列傳府志同舊志列經濟

劉璟字德輝成化乙未進士初試刑部政當外補林莊
 敏公疏留本部理刑授主事陞員外郎郎中勘事慮
 囚輒多稱旨用大臣薦出守松江在松八載勸農桑
 修水利敦士習治豪滑有城隍夙靈太守廉明之謠
 再補太原剋奸植良歲積賑儲以數十萬計陞四川
 叅政有屯軍稱亂璟撫平之晉山東布政使擢都御
 史巡撫宣府查復草場孳牧利賴陞刑部侍郎勅勘
 大同武弁不法事稱旨陞尚書加太子少保璟正已
 平刑多裨國事廷訊逆瑾尤懾餘奸以老告歸上命

有司給月廩輿夫所居堂曰怡閒駕部吳鼎撰記壬
 申寇燬詔優卹之以壽終賜祭葬如例以子訥考尚
 書績特進光祿大夫大司馬秦金立傳長子詵由官

監授鴻臚寺序班

省志叅松江府志
 列傳府志同舊志列名德
 省志入

陳溥字一卿實之裔也洪治乙丑進士授大理寺評事
 以忤逆瑾謫武鄉縣丞稍遷陽曲知縣瑾誅陞戶部
 主事員外郎中奉勅總理宣大糧儲尋轉山東布政
 司右叅議守海右道是歲大飢溥冒雪賑恤全活者

甚衆因感疾上疏請歸時年三十有五子棻

省志入
 列傳府
 列傳

志同舊
志闕

劉訥字思存鄆陵人父璟刑部尚書登正德十二年進士爲寧國推官攝蕪湖縣事武宗南巡中官索賄不得繫詔獄世宗立復官尋擢御史遷南京通政叅議歷轉刑部尚書召改北初帝幸承天河南巡撫胡纘宗以事笞陽武知縣王聯聯尋爲巡按御史陶欽夔劾罷聯素克狡嘗毆其父良論死久之以良請出獄復坐殺人求解不得知帝喜告訐乃撫纘宗迎駕詩穆王八駿語爲謗詛言纘宗命已刊布不從屬欽夔

論黜羅織成大辟候長至日令其子詐爲常朝官闕入闕門訟寃凡所不悅若都御史劉隅給事中鮑道明御史胡植馮章張洽叅議朱鴻漸知府項喬賈應春等百十人悉構入之帝大怒立遣官捕纘宗等下獄命訥會法司嚴訊訥等盡得其誣罔仍坐聯死當其子詐冒朝官律斬而爲纘宗等乞宥帝旣從法司奏坐聯父子辟然心嘆纘宗頗多詰讓下禮部都察院叅議嚴嵩爲之解乃草纘宗職杖四十訥亦除名法司正貳停半歲俸卽官承問者下詔獄嵩以對制

平獄有功令兼支大學士俸嵩辭乃允時法官率飢法徇上意稍執正譴責隨至訖于是獄能持法身雖


黜而天下稱之 明史本傳 舊志列 節義府志人列傳

按公號春岡留心文獻舊志是其創稿嘉靖三十八年卒賜祭葬贈太子少保榮祿大夫

陳棐字汝忠少叅溥長子幼瑰異博極典籍以文章節義自命登嘉靖乙未進士授中書舍人改禮科給事中直言敢諫嘗有名諫草功在萬世又疏請薛文清瑄從祀孔廟會再言事忤權貴謫長垣丞歷刑部員外郎郎中督學山西所獎拔皆英俊以陝西觀察使

擢都御史巡撫甘肅甘肅孤懸河外三面受敵棐至修墩堡備器械恤降實伍經畫多遠畧詳甘肅邊防記又嘗捐俸置經史集四厨于甘鎮儒學文事武備振厲一時以疾致政還所著有文岡集二十卷八陣圖說一卷火車陣圖攷二卷卒之日無雲而雷人以爲異 舊志入 節義

王瑞字靜齋先世洪洞人明初占籍鄆陵世有隱德瑞補弟子員食廩餼貢於太學授寧州同知廉潔自愛有循聲以疾終子二鶴齡鶴年鶴齡字鳳羣鶴年字



松巢少失怙兄弟相勗讀書蚤歲俱遊庠嘗偏于強鄰齡語弟曰非讀書無以禦侮且讀書亦吾家事汝其力學家務我督之不煩汝也是科鶴年果舉於鄉歸復語弟曰嗣後家事汝任之吾亦當潛心矣遂閉戶不出刻勵奮發閱數年齡復膺鄉薦隣人懼兄弟終不與校人咸服其量齡授常州府通判陞忻州知州勇決有為務行其所學政聲大著以老歸鶴年性淡薄不攬心塵事惟嗜詩書恒至廢寢食任崞縣令每以奔走為苦未週歲即致政旋里課五子晝夜絃

誦不輟時咸服其高三世孝友鄉黨推服公舉瑞與

鶴齡從祀鄉賢人益以為榮云

舊志闕

鄭友諒字誠甫少為諸生有重名聚徒授經以經世大儒自期鄢靳賢書垂五十年諒課其孝秀飾以文采斌斌嚮風比于鄒魯一時高第如梁克順梁克從諸公悉出其門以明經判成都寧越寧越獯種雜處器競喜鬪素號難馴諒推誠布公洗滌習俗飭黌舍立社學復貢額舉鄉飲宣聖諭誦家禮教化大行故昔號為陰黠變詐桀驁難制者皆畏服俛首受漢索時

有黎酋馬應龍據牛心山為叛監軍麾兵屬諒諒度賊巢重嶺無水賊必遁勒兵左右翼圍之賊果中夜委輜重走俘斬不可勝計居寧越八載西南邊徼賴以綏輯者甚眾遷貴州麻哈州知州上疏乞骸歸杜門訓子立期講學逍遙初服十餘年年七十一無疾終以次子二陽貴贈都御史中憲大夫門人梁侍御等二十餘人私諡曰簡定先生俎豆于鄉華亭陳繼儒為立傳府志入藝文傳舊志列理學

梁克順字子迪號篆一天資睿敏少刻苦力學與兄克

肖弟克從每試輒互為冠軍時號三梁嘗以舊廬次讓同學新考候補者食其餼督學使者亟為稱獎萬歷丁酉選貢己酉中鄉試數困公車己未授盩厔知縣縣久疲俗復悍健訟稅糧逋欠積至七年且縣治終南五百里故多盜難捕順銳意振飭牘無停滯積習為之一變縣多水田人或爭水利不均輒構訟順度勢決策開起鳳龍灣等渠五十餘道灌溉之民賴其利復甃城濬濠講鄉約編保甲一切為久遠計去之日送者絡繹于道天啟乙丑考選南京雲南道御

史巡視京營觸璫削籍崇正改元盡召還先朝削奪
諸臣願復原官尋罷歸杜門謝客自鈔書訓誡諸子
每慮一門四登科第履盈處滿宗支日盛恐漸行橫
肆取怨鄉黨嚴約束之鄉人戴之建祠祀焉卒大司
空靳于中誌其墓所著有澹寧樓文集孫熙亦任御

史

府志參蓋屋縣
志舊志列名德

梁克從字爾徽少爲諸生督學李化龍見其文深賞識
之目爲國士戊戌成進士授蓋屋縣知縣治行有聲
陞禮部主事調吏部在吏部一爲考功主外計一爲

文選掌選事皆謝絕苞苴門無私牘同官甚敬憚之
轉奉常少卿感末疾以子廷棟成進士遂不復出從
生平簡約不務張皇一狐裘三十年與人交無城府
身居清要子位九列無幾微驕奢見于顏色不蓄聲
伎不求玩好惟對客奕棋娛樂終日嘗置祭田二百
畝粢盛之餘卽以贍給宗族崇正壬午闖賊攻汴左
良玉提重兵赴援疑鄔弗拒賊欲屠之從力言小民
畏死而已無通賊狀請急圖賊以姑置此殘黎良玉
引兵去鄔得亡恙後從誤聽孺子言携家人入保于

汴汴被水從舉室死洪流中鄆人聞者為之罷春

省志

入列傳府志同
舊志列名德

劉賁卿字以成大司寇訥曾孫南康太守巡孫起家乙
榜筮仕肅寧肅寧為逆闖魏忠賢梓里時闖黨方張
族屬假藉聲勢莫可誰何賁卿一切法治之不少貸
事載頌天臚筆當是時人方走闖竇如鷺賁卿身履
虎穴絕無依附且數撻其鋒闖大怒命御史崔呈秀
借修城事劾之疏上矯旨革職崇正改元逆闖伏辜
科道官交章薦賁卿特旨起補監利知縣丁父憂不

赴後改博野知縣行取輦下烈宗知其任肅寧時事
御書直節勁氣四字賜之天語褒嘉人傳以為榮時
屈指資深望重者無出賁卿右賁卿因有所避乃舍
清華就一司城其介然特立如此未幾陞南計部遷

夔州太守致仕歸精于醫

省志入列傳府志
同舊志列節義

常自裕字君容別號二如萬歷己未進士初授安慶府
推官明刑平反恩威互著時巡江闕操咎違令萬戶
一軍盡譁公正議危詞眾遂懾服伏法人皆服其靜
定三藩之國大璫怙勢作威多索絳夫且虐使之溺

死者無笑公詣王舟力請得獲寬減又拒撤道傍民居之令使沿江無騷動之虞任滿行取授刑科給事中時用法嚴峻公上疏極言國家之元氣當培上下之血脉宜通疏累千言皆切中世務天子嘉納爲停是年秋決至于糾彈不避權貴如孫必顯之貪肆詹士龍之老病公皆上疏論列各逮問褫職有差在廷服其敢言疏每上輒得溫旨一時稱得君之專焉奉命巡視京營陞吏科右又陞兵科左時寇起關中督臣議撫公力言不可乃內外急成撫局以希塞責卒

釀後來之禍陞兵科都給事中論東江兵不可撤鞏華城宜設備其慮深遠究爲當事所中沮有識者共惜之公任諫垣七年章三百餘上皆關國家大計陞南少常轉正尋陞南通政使司通政使再陞南戶部左侍郎兼僉都御史督理糧儲敘前兵垣西寧捷功加二品服俸正己率屬廉操益勵黜改折杜冒支旬期間倉庾充溢盡如歲額改北戶部右侍郎督理錢法會遭詹兆恒疏論兆恒者卽公前任刑垣所劾士龍子也兆恒又嗾其黨袁愷羅織并及于首輔薛國

觀逮法司後上知韓城之寃一時正人君子咸開釋之豫王定江南錄舊官公辭以疾遂歸里屏居鄉墅履絕城闔惟教子課農而已 詔求遺賢有司欲薦公公力謝守志以歿士論高之

府志入列傳舊志列經濟

鄭二陽字敦次別號潛庵麻哈州知州友諒仲子中萬歷己未進士初授德安司理聽斷明允事無寃滯視篆孝感舊例歲派富民數人供驛傳帷帳器具民苦之公至悉自置辦永除其弊先是潞藩諸莊中官往來收租民不勝其擾乃為設立區頭供億賠償又輒

破產及公請于臺司罷區頭有司為之徵解中官止受成事人乃便之行取如京父老攀轅餞送絡繹山谷時逆璫專國氣焰熏灼令所私授公疏稿使劾奏楊公璉不法事清要可立得公不從璫意遂左乃授南工曹歷吏禮二部郎中遷海防僉事當是時寇犯鳳陽焚祖陵淮揚大震公韎韐臨戎簡練將卒一切戰守之具無不備及寇再躡滁州屠六合而揚卒無烽火之警者皆藉公綢繆之力也舉廉卓第一加叅議泰州以竈變告即親歷諸場開諭為除蠹害事遂

寢淮南旱蝗饑民枕籍于道乃立五厰賑濟之全活甚衆公治揚五載寬房稅毀舖禁草贖緩停鳳米釐別百年積弊民甚德之及去任郡城瓜州泰州東臺建祠祀公者六用廷臣薦召入平臺烈宗親問練兵措餉之計公對以額設之兵原有額餉但求練實則兵不虛冒餉自足用是練兵卽所以足餉若兵不練實雖措餉何益措餉又貴得人得人則利貴公家矣烈宗又問各處災傷奈何公復對裁不急之官以省費用下寬大之詔以收人心上悉稱善卽擢僉都御

史巡撫安慶協理勦寇軍務時所屬地界三省羣盜日熾會楚豫淮皖合勦五營大賊丁啟睿破張獻忠于麻城公乃提兵與宋一鶴及鳳陽總督朱大典感賊左金王老回回等于潛山懷寧山中追破爭世王于燈草坪斬首千八百級一時東南半壁賴公保障乃被誣逮法司旋卽釋之將治裝值國變與周元亮微服出都門寓居京口丙戌歸里杜門以詩文自娛屢薦不起敦宗睦族至老不倦鄉里咸以鄭佛呼之尤好竺典至易簣猶未嘗廢卒于家年七十有一當

公任皖江時天下差徭繁重而鄢尤甚數歲之中正額
 外有遼餉流餉新餉練餉鞭銀草稍銀米荳銀鄉
 兵工食銀運糧車脚銀騾馬硝黃銀諸名色復有小
 灘買米幫貼銀漸加至萬金鄢民苦之公適過里門
 與按臺高公力言之弊政悉除鄉人尤感其德共議
 建祠以祀公一時踴躍從事者六百餘人勒石誌之
 及卒德安揚州各紳士合詞請祀名宦著有益樓文
 集禮要諸書行於世

省志參揚州府志及紀事本末舊志入經濟

梁廷棟字无它鄢陵人父克從太常少卿廷棟舉萬歷

四十七年進士授南京兵部主事召改禮部歷儀制
 郎中天啓五年遷撫治西寧叅議七年調永平兵備
 副使督撫以下為魏忠賢建祠廷棟獨不往乞終養
 歸崇正元年起故官分巡口北道明年加右叅政十
 一月

國朝大兵克遵化巡撫王元雅自縊卽擢廷棟右僉都
 御史代之廷棟請賜對面陳方畧報可未幾督師袁
 崇煥下獄復擢廷棟兵部右侍郎兼故官總督薊遼
 保定軍務及四方援軍廷棟有才知兵奏對明爽帝

心異之三年正月兵部尚書申用懋罷特召廷棟掌部事時京師雖解嚴羽書旁午廷棟剖決無滯而廷臣見其驟用心嫉之給事中陳良訓首刺廷棟同官陶崇道復言廷棟數月前一監司耳倏而爲巡撫總督本兵國士之遇宜何如報乃在通州時言遵永易復良固難破自以爲神算今何以難者易易者難且嘗請躬履行間隨敵追擊以爲此報主熱血今偃然中樞熱血何銷亡也謂制敵不專在戰似矣而伐謀用間其計安在帝不聽崇道言廷棟疏辨乞一巖疆

自效優詔慰留之未幾工部主事李逢中劾廷棟虛名崇道又言廷棟輕于發言致臨洮固原入衛兵變帝皆不納五月永平四城復賞廷棟調度功加太子少保世廕錦衣僉事其秋廷棟以兵食不足將加賦因言今日閭左雖窮然不窮于遼餉也一歲中陰爲加派者不知其數如朝覲考滿行取推陞少者費五六千金合海內計之國家選一番守令天下加派數百萬巡按查盤訪緝餽遺謝薦多者至二三萬金合天下計之國家遣一番巡方天下加派百餘萬而曰

民窮于遼餉何也臣考九邊額設兵餉兵不過五十萬餉不過千五百三十餘萬何憂不足故今日民窮之故惟在官貪使貪風不除卽不加派民愁苦自若使貪風一息卽再加派民懽忻亦自若疏入帝俞其言下戶部協議戶部尚書畢自嚴阿廷棟意卽言今日之策無踰加賦請畝加九釐之外再增三釐于是增賦百六十五萬有奇海內竝咨怨已陳釐弊五事曰屯田曰鹽法曰錢法曰茶馬曰積粟又極陳陝西致寇之由請重懲將吏貪汙者以紓軍民之憤塞叛

亂之源帝皆哀納廷棟居中樞歲餘所陳兵事多中機宜帝甚倚任八年冬召拜兵部右侍郎兼右都御史代楊嗣昌總督宣大山西軍務明年七月

國朝大兵由間道踰天壽山克昌平逼京師山後地乃廷棟所轄也命戴罪入援廷棟懼未幾卒廷棟旣歿其父克從尚在後賊破鄆陵避開封及開封被淪死

于水

明史本傳府志入列傳舊志入節義

蘇守範字念之萬歷己未進士初任清河調繁永平水蘖自矢囊橐蕭然人有勸之營賄者作述詩懷云當

年空遠志小草出平干醫懶堪爲吏救貧豈在官琴
彈千古韻雪積一庭寒世路知音少相憐應自難聞
者高之

舊志

韓法愈字去病別號弢菴上林苑監監丞自重第五子
生具異相臚腑皆見幼穎悟十歲能屬文十三就試
督學竒之擢冠童子軍是年卽補餼才俊之譽播于
閭里治舉業之暇復肆力古學有和陶飲酒詩二十
首及弢菴文集一時傳誦梁宋間年二十四成進士
其在京邸尤擇交所深契者則張受先徐九一也初

授山東堂邑知縣時白蓮賊煽亂二東多故法愈力
行鄉約保甲團練鄉勇以是盜賊蠶起而堂獨宴然
所著鄉約合冊爲上臺所亟稱檄布各屬做行之暇
卽集諸生課業成就甚衆庚午分較秋闈得稱人又
堂邑當漕運之衝梁家淺多淤爲艘梗每先期疏鑿
舟至卽破浪而北不復知有牽挽之勞他如禁却贖
緩火耗人服其廉堂舊徵糧里胥截收意爲輕重民
甚苦之法愈廉得其弊令民自封投櫃里胥不得因
緣爲奸循吏之名籍甚山左大計舉卓異檄攝冠治

一如堂再調繁益都治亦如之涖益未幾會病時方
行取未治裝而卒卒之年纔二十有七時論惜之

舊志

入經濟

國朝

梁熙字曰緝性孝友事繼母曲盡色養家庭雍睦中順
治乙未進士初任咸寧令冰潔自矢不數月行取補
臺垣孤身京邸門無私謁侃侃任職直聲著朝端巡
視茶馬于秦不名一錢以疾乞歸杜門暫次齋日惟
稽古賦詩而已康熙四十三年祀鄉賢熙任京職時

立品最高潔往還皆天下知名士而葉子吉汪鈍翁
劉公勇王西樵阮亭兄弟尤重之及解組歸高念東
以詩送行有蕭然襍被燕山送一箇嵩邱行脚僧人
以為知言生平精內典釋書多所撰注著有哲次齋

集行于世

省志入列傳府志同舊志闕

劉漢藜字博仲夔州太守賁卿子幼聰穎過人及長博
學淹雅能詩善屬文工蘇米書以恩選充貢除淮安
清河令地濱大河為衝要繁劇之區民疲奔命往往
他徙以避徭役藜多方招徠除其逋賦數月間增戶

數百邑故以丁田定賦額而站支之費悉取給于丁徭歲費無算民不能支熬矢公編審增減有差民始無不均之嘆洎任僅八月頌祝之聲載道以勞瘁感疾卒于官囊無餘資賴故人賻贈乃克歸著有寶蘇齋集子五佑僕儼僕僕皆列文學佑登順治己亥進

士

舊志闕

梁之鯤字鵬溟憲副策之孫也性孝友敏而好學明季流寇陷鄆迫脇以偽令之鯤怒罵不屈身中數鎗不仆聲色愈厲賊異而釋之 國朝以明經授武鄉宰

甫下車卽力請上憲豁漲沒地懸糧出淹禁欠戶數十人邑石盤里寥澗無村落盛夏行人病渴鯤捐建茶菴掘地得甘泉土人泐石紀德名其泉曰梁公泉以疾請休杜門謝客絕跡公庭詩酒自娛間及繪事邑令經起鵬知其淹博延修邑誌數與鄉飲壽八十

八歲著有聞茗堂集

續志入節義

常翼聖字百子號槐壇明司農自裕季子也少深沉有大志明末寇起移家百人于河北遇督師遊兵欲劫之翼聖甫成童挺身出叱退之隨父抵金陵遇風舟

幾覆翼聖虔禱忽有綠色鳥集乃定中順治辛丑進士初任江南潁上縣聞邑有豪棍藏鏹巨萬結賄爲奸翼聖泣任首除之縣有江口鎮月出米十數石供官食又有八里梁鎮爲官府行厨給器用翼聖知其積弊悉草去之未幾鳳屬大饑翼聖曰是未可以常法救也乃于家運糧數百石自泊河達潁以爲之倡富民由是踴躍樂輸潁賴無恙督憲深爲嘉予委署霍邱篆霍故多盜又遇災荒人心洶洶翼聖雪夜乘機率民兵獲賊首二人餘俱解散旋設法賑濟霍民

亦皆保全督撫交章首薦行取授福建道監察御史秉法肅紀豪惡歛跡視鹺兩浙力請蠲免浙鹽積欠會京兆乏人

聖祖謂京師旗民襍處必公正有才識者始克治之常翼聖生平廉謹可任此職特擢爲京兆尹輦轂之下肅然一清累官至大理寺正卿以年老乞休蒙俞旨歸里爲鄉飲大賓壽至八十有九終翼聖數被恩寵庚辰隨駕暢春苑蒙

賜御書一幅鄉里至今以爲榮

舊志關

王曰温字子厚一字綠野少負軼才年十一入邑庠督學張天植卽以大器許之康熙癸卯舉于鄉丁未中進士與父鳴球同對策大廷曰温選庶吉士慨然有經世志初授兵科給事中再陞本科掌印白簡所陳毫無所避親病假歸補戶科掌印給事中前後章疏數十上皆有關國家大計而侃侃無所阿附尤爲人所難庚申冬御試臺省諸臣問以進勦機宜轉輸方畧所奏


聖祖親加較定奉有條奏詳明克稱言職之諭是時

三逆蠢動多隱用其謀畧而人不之知也壬戌勘黃運兩河大工長堤數千餘里尺計寸較繪圖入告稱旨嘉賞累官至提督四譯館太常寺少卿

聖祖東巡特遣祭告東鎮沂山等處事竣疾作卒于臨清舟次年僅四十有二朝野惜之睢陽湯文正斌誌其墓曰温任給事中時曾侍乾清宮御宴

聖祖首倡栢梁體詩曰温亦得遞廢人傳以爲榮所著有賜宴紀事于役紀事兵垣奏議戶垣奏議傳青堂

集省志入列傳府志同舊志闕



張素志字道援號豫洲弱冠補諸生雍正己酉膺鄉薦
聯捷成進士當卽試用直隸攝篆平鄉雪冤抑釋株
累懲奸胥民大悅每公出多焚香戴祝者題授阜城
未幾丁內艱歸服闋補無極縣訟至卽決案無留牘
遇有當驗奪者必親歷不以勞瘁辭嘗曰令原以親
民倘深居簡出則下情擁於上聞或委僚吏又恐是
非混淆於心終不安也邑多陋規悉除去境有木道
溝數十里皆流砂堤不能立制憲聽浮言檄令疏築
志恐勞民罔效且貽後累具稟陳請七上乃寢嘗奉

檄辦火硝銅劬志卽捐俸辦繳民不與知三年奏最
調繁獲鹿邑當孔道多疑獄有累年未決者志至立
剖釋之又嚴抑豪強設義學以興文教邑居山中狼
常爲患懸重賞撲去之龍石山下隅阪地百餘頃山
水渟注廢棄已久志相度形勢躬率挑濬不逾月渠
通水達金河成良田人呼爲張公渠以卓異正薦等
調清苑首邑會通省大興水利清邑工獨夥成梁建
閘三河並修逾歲報竣漸以勞瘁成疾告歸養親踰
二載遭父喪躡踊泣血疾轉劇竟以是卒年五十二

著有雜藝畧存藏于家子二汝黠汝藝皆邑庠

[Faint bleed-through text from the reverse side of the page]

鄢陵縣志卷之十二

人物志二 孝友 忠義 儒林 文苑

孝友 忠義

冠冕百行莫大乎孝推而友于而忠節而孝備矣
舊志庾袞以下五六人其孝行皆表表史傳者而
不錄庾珉兄弟入忠烈豈其悲憤遇害尚未稱完
節乎我

國家崇尚實行凡忠孝節義特著

令典各建專祠以祀其風世覺民至深切矣志孝友忠



義

晉

庾袞字叔褒明穆皇后伯父也少履勤儉篤學好問事親以孝稱咸寧中大疫二兄俱亡次兄毗復殆癘氣方熾父母諸弟皆出次于外袞獨留不去諸父兄強之乃曰袞性不畏病遂親自扶持晝夜不眠其間復撫柩哀臨不輟如此十有餘旬疫勢既歇家人乃反毗病得差袞亦無恙父老咸曰異哉此子守人所不能守行人所不能行歲寒然後知松栢之後凋始疑

疫癘之不相染也初袞諸父並貴盛惟父獨守貧約袞躬親稼穡以給供養而執事勤恪與弟子樹籬跪以授條或曰今在隱屏先生何恭之過袞曰幽顯易操非君子之志也父亡作筭賣以養母母見其勤曰我無所食對曰母食不甘袞將何居母感而安之袞前妻苟氏繼妻樂氏皆官族富室及適袞俱棄華麗散資財與袞共安貧苦相敬如賓母終服喪居于墓側歲大饑藜藿不糲門人欲進其飯者而袞每日已食莫敢為設及麥熟獲者已畢而採捃尚多袞乃引

其羣子以退曰待其間及其捃也不曲行不旁掇跪而把之則亦大獲又與邑人入山拾橡分夷嶮序長幼推易居難禮無違者或有斬其墓栢莫知其誰乃召鄰人集于墓而自責焉因叩頭泣涕謝祖禰曰德之不修不能庇先人之樹袞之罪也父老咸亦爲之垂泣自後人莫之犯撫諸孤以慈奉諸寡以仁事加于厚而教之義方使長者體其行幼者忘其孤孤甥郭秀比諸子姪衣食而每先之孤兄女曰芳將嫁美服既具袞乃刈荆苕爲箕箒召諸子集之于堂男女

以班命芳曰芳乎汝少孤汝逸汝豫不汝疵瑕今汝適人將事舅姑灑掃庭內婦之道也故賜汝此匪器之爲美欲溫恭朝夕雖休勿休也而以舊宅與其長兄子賡翁及翁卒袞哀其早孤痛其成人而未娶乃撫柩長號哀感行路聞者莫不垂涕初袞父誠袞以酒每醉輒自責曰余廢先父之誠其何以訓人乃于父墓前自杖三十鄰人褚德逸者善事其親老而不倦袞每拜之嘗與諸兄過邑人陳準兄弟諸兄友之皆拜其母袞獨不拜準弟徽曰子不拜吾親何袞曰

焉陽縣志 卷之十一
三
未知其所以拜也夫拜人之親者將自同于人之子也其義至重袞敢輕之乎遂不拜準徽歎曰古有亮直之士君近之矣君若當朝則社稷之臣歟君若握兵臨大節孰能奪之方今徵聘君實宜之于是鄉黨薦之州郡交命察孝廉舉秀才清白異行皆不降志世遂號之爲異行元康末潁川太守召爲功曹袞服造役之衣杖鍤荷斧不俟駕而行曰請受下夫之役太守飾車而迎袞逡巡辭退請徒行入郡將命者遂逼扶升車納于功曹舍旣而袞自取已車而寢處焉

形雖恭而神有不可動之色太守知其不屈乃歎曰非常士也吾何以降之厚爲之禮而遣焉齊王問之唱義也張弘等肆掠于陽翟袞乃率其同族及庶姓保于禹山是時百姓安寧未知戰守之事袞曰孔子云不教而戰是謂棄之乃集諸羣士而謀曰二三君子相與處于險將以安保親尊全妻孥也古人有言千人聚而不以一人爲主不散則亂矣將若之何衆曰善今日之主非君而誰袞默然有間乃言曰古人急病讓夷不敢逃難然人之立主貴從其命也乃誓


之曰無恃險無怙亂無暴鄰無抽屋無樵採人所植
無謀非德無犯非義戮力一心同恤危難衆咸從之
于是峻險阨杜蹊徑修壁塢樹藩障考功庸計丈尺
均勞逸通有無繕完器備量力任能物應其宜使邑
推其長里推其賢而身率之分數旣明號令不二上
下有禮少長有儀將順其美匡救其惡及賊至袞乃
勒部曲整行伍皆持滿而勿發賊挑戰晏然不動且
辭焉賊服其慎而畏其整是以皆退如是者三咸語
曰所謂臨事而懼好謀而成者其庾異行乎及罔歸

于京師踰年不朝袞曰晉室卑矣寇難方興乃攜其
妻子適林慮山事其新鄉如其故鄉言忠信行篤敬
比及期年而林慮之人歸之咸曰庾賢及石勒攻林
慮父老謀曰此有大頭山九州之絕險也上有古人
遺迹可共保之惠帝遷于長安袞乃相與登于大頭
山而田于其下年穀未熟食木實餌石藥同保安之
有終焉之志及將收獲命子恟與之下山中塗目眩
瞽墜崖而卒同保赴哭曰天乎獨不可舍我賢乎時
人傷之曰庾賢絕塵避地超然遠迹固窮安陋木食

山棲不與世同榮不與人爭利不免遭命悲夫衰學
 通詩書非法不言非道不行尊事耆老惠訓蒙幼臨
 人之喪必盡哀會人之葬必躬築勞則先之逸則後
 之言必行之行必安之是以宗族鄉黨莫不崇仰門
 人感慕爲之樹碑焉有四子恂茂澤摺在澤生故名
 澤因摺生故曰摺茂後南渡江中興初爲侍中茂生
 願安成太守晉書孝友傳 省志 入孝義府志舊志同
 褚德逸鄆陵人善事其親老而不倦與衰隣居時衰以
 孝友爲鄉黨所推重每過衰家見必拜之晉書庾衰 傳舊志闕

南北朝

庾道愍潁川鄆陵人晉司空冰之玄孫也有孝行頗能
 屬文少出孤悴時人莫知其所生母流漂交州道愍
 尚在襁褓及長知之求爲廣州綏寧府佐至南而去
 交州尚遠乃自負擔冒險僅得自達及至交州尋求
 母雖經年日夜悲泣嘗入村日暮雨驟乃寄止一家
 見有一嫗負薪外還而道愍心動因訪之乃其母也
 於是行伏號泣遠近赴之莫不揮淚道愍尤精相板
 宋明帝時山陽王休祐屢以言語忤顏見道愍託以



已板為他物令道愍占之道愍曰此乃甚貴然使人
多愆忤休祐以褚彥回詳密求換其板他日彥回侍
明帝自稱下官帝多忌甚不悅休祐具以狀言帝乃
意解道愍仕齊位射聲校尉族孫沙彌亦以孝行著

南史孝義傳
省府舊志同

庾子曜弘遠之子也弘遠將刑子曜抱持父哀乞代命

遂併殺之時年十四

南史庾悅傳
舊志闕

庾沙彌潁川鄆陵人也晉司空冰六世孫父佩玉輔國
長史長沙內史宋昇明中坐沈攸之事誅沙彌時始

生年至五歲所生母為製采衣輒不肯服母問其故
流涕對曰家門禍酷用是何為既長終身布衣蔬食
起家臨川王國左常侍遷中軍田曹行叅軍嫡母劉
氏寢疾沙彌晨昏侍側衣不解帶或應鍼灸輒以身
先試之及母亡水漿不入口累日初進大麥薄飲經
十旬方為薄粥終喪不食鹽酢冬日不衣綿纊夏日
不解衰絰不出廬戶晝夜號慟隣人不忍聞所坐薦
淚霑為爛墓在新林忽生旅松百餘株枝葉鬱茂有
異常松劉好噉甘蔗沙彌遂不食焉族兄都官尚書

詠表言其狀應純孝之舉梁武帝召見嘉之以補歛
令還除輕車邵陵王叅軍事隨府會稽復丁所生母
憂喪還都濟浙江中流遇風舫將覆沒沙彌抱柩號
哭俄而風靜蓋孝感所致服闋除信威刑獄叅軍兼
丹陽郡累遷寧遠錄事叅軍轉司馬出爲長沙令卒
子持亦有孝行見陳史南史孝義傳叅梁書孝
行傳 省府舊志同

唐

任客奴割股肉以愈父病與京兆張阿九等皆表門賜

高唐書孝友傳
省府舊志同

宋

許瓊開封鄆陵人年九十九長子年八十一次子年七
十九再次名永年七十五一門孝友靄如也開寶五
年永罷廬氏縣尉詣闕欲乞近地一官以便養上卽
命迎瓊赴闕對於講武殿親臨顧問久之言唐末以
來事歷歷可聽詞氣不衰上悅賜襲衣犀帶茶帛授
永郾城令是時澶密齊沂萊江吉萬州江陰梁山軍
各奏八十已上呂繼美等二十九人並賜爵公士真
宗時凡老人年百歲已上者州縣以名聞詔皆賜衣

鄆陵縣志

卷之十二 人物志

孝友

帛米麥長史存撫之

弘簡錄本傳
舊志列名德

元

夏全累世同居與休寧朱震雷等皆嘗表門復稅

元史
孝友

傳 省府
舊志同

明

夏榮字茂卿父年九十二卒未幾母沒榮廬墓側終喪
不去妻子或至墓未嘗與相見一日野火至廬忽暴
風吹滅人以為孝感洪武十四年以孝廉薦知吳縣

孫昂曾孫瑋

省志列孝義
舊志同

牛興福淵子輔孫也三世皆遁跡邱園積善行義而興
尤孝友出於至性居閭里急人所無傾囊倒廩無吝
色一時推服之及卒薛文清公表其墓子良舉于鄉
累官兩淮運司孫理曾孫緩連登仕籍人皆謂積善
之報云 薛文清
墓表
解禮字敬宗父母俱瞽起居飲食皆禮躬奉父沒號慟
幾絕母疾禱于天願以身代迨沒哀咽勺水不入口
既葬廬墓側負土築墳植栢數千株欲井灌溉偶出
廬若有附耳者云此有井及掘地果得一井灌栢俱

成景泰四年知縣康健奏表其門 國朝纂明史載

其名入孝義傳 省志列孝義 舊志同

張縉字士紳幼失怙恃依祖母劉氏以成季父大司徒

睿在朝縉侍劉膝下孝養勤篤睿倚重之劉年九十

二卒馳贈夫人縉倚廬三年躬負土于墓手植檜栢

有羣兔馴行蛇蝟守護之異天順六年有司奏表其

門 省志入孝義 舊志同

夏瑭字天美同知昂子少有大志自補弟子員便以聖

賢事業為己任嘗與諸友會講道遇醉者與錢同行

者取以買果瑭不取以義責之食者愧謝性極孝友

父疾藥用斑毛求數日弗獲號泣欲絕忽一燕啣置

几上藥成而疾愈人以為孝感居父喪哀毀骨立不

用浮屠終三年一遵古禮士喪服不失制自瑭始事

異母兄曲盡友恭弘治乙卯舉于鄉明年以舉人授

署齊河訓導事束修一介不受諸生中有貧者推俸

調之及門登科者數人卒于官諸生殊慟既各設主

私祀復祀各宦 舊志省府 志入列傳

鄭理字得中一門孝友五世同居曾祖士能祖方父寬

壽皆八十餘理年九十步履康強曾元林立嘉靖戊子詔賜肉帛大司寇劉訥為文紀之仍題其居曰世

有家範曾孫友諒

舊志參鄆署雜抄

田大印事母極孝母胥氏守節撫印一日病篤夜思肉羹印焚香告天封左股肉烹以進母獲愈後數年母死印結廬墓側號泣抔土蔬食三年足跡不至其家嘉靖二十九年知縣張守蒙上其事旌之復與鄉飲

以壽終

舊志闕

陳銓字秉衡少謹厚不妄言動補邑弟子有聲同邑程

鶴為其女擇壻得銓快甚成化間大疫銓侍父母疾衣不解帶者三月人比之庾異行尤敬事諸父友愛昆弟疏族咸睦弘治乙丑當貢于禮部會子溥舉進士銓曰吾尚伊唔老牖下耶乃卜築西郊結社講道不談時政不履公門直躬化俗有太邱遺風以子溥貴進階朝列大夫大學士賈詠表其墓

舊志

梁策字對之鄆陵人性至孝七歲母病日夕焚香泣禱願以身代母愈就外傳手孝經不釋嘉靖乙丑登進士授工部主事歷員外郎中十年中三請告省親留



妻侍養未嘗隨任陞四川成都知府嘆曰我不能叱馭如王陽矣抵家蒲伏父前號泣以請父大怒曰盡力王事非孝乎爾好孝經不憶始于事親終于事君耶伏地不起舉杖欲擊方起而戒塗抵成都數月大計計畢疏請終養時父母年皆七十躬調甘脆未嘗任侍兒茶湯必跪進父老而好游日游于親知家寒暑不輟每至漏下數十刻秉燭坐待闈人報趨門迎掖入室候寢定而退質明盥沐問侍婢安否二人壽皆八十母歿喪毀如禮既葬日廬夜歸侍父父病脾

不能離衽席調飲食跪榻下手舉匕飭以進如此者年餘父歿既合塋廬墓側服闋不能去親族哀之勸令歸遇祭祀輒衣短衣自推磨以供粢盛時稱爲梁孝子初仕時部送遼左軍餉餉獨如額軍士懼聲動地主帥盛筵再拜曰近日所僅有也營繕董大工往年錢穀盡中官處分闌出無筭一切禁草日欲中傷之陰伺無所得改度支郎督維揚餉裁革一切冗費揚人感嘆不容口晉郎中敘功當陞尚寶以忤中官故陞知府及親終巡按御史累列孝行以聞詔補登

州府時倭蹂朝鮮登州戒嚴戍南兵三千策白督撫
 曰瀕海多健兒與衣廩而訓教之皆精兵也豈不勝
 召募耶督撫稱善數月得精兵數千陞陝西副使卽
 道歸杜門却掃依依墓田惟卹族賑乏爲務戚屬中
 多待以舉火而自奉布素謙退古處鄉黨稱述無間
 言一日人見其園中有鶴飛去移晷策逝子可養字
 克中太學生克承父訓以孝友聞兩弟天亡養撫其
 嫠婦暨孤姪女飲食衣服纖悉周至一時臺司旌其
 象賢萬歷十六年大饑養出粟數百斛賑之全活數

獨甚多又嘗製綿襖施無衣者不可數計其積德類

如此以壽終府志孝義
 叅舊志

梁範字錫之事親最孝孀母垂六十年不衣冠不敢見
 有姊家貧範給糈授衣終其身性伉直好急人之急
 片言相許竭力營綜兄策歿其子孤而幼範竭力撫
 之無異兄未歿時迨孀母歿範已皤然猶作孺子泣
 襄大事年六十八始挾胄監籍謁選人得東鹿丞力
 疾視事雅不負丞職轉遵化衛經歷投牒乞休卒于
 家大中丞鄭二陽爲立傳舊志



常應泰號益軒性謙退好學為諸生砥躬飭行未常一涉于俗且孝友性成當折產之日腴田完宅悉讓于兄而自處淡泊居鄉恂恂亦不以聲華自炫恬靜和雅為鄉里所稱子自裕萬歷己未進士累官戶部右侍郎仲孫錫胤順治戊子舉人累官山西道監察御史季孫翼聖順治辛丑進士累官大理寺正卿曾孫弘禧亦辛丑進士建洋知縣一門科第蟬聯人皆謂應泰積德累仁所致遇封典如其子官

府志入列傳舊志列名德

韓自重字威卿篤行好學事親極孝幼從麻城劉生授

春秋儕輩避席年十六奉父命肄業成均以父病請歸侍湯藥父歿一切喪葬獨力營辦不敢以謀于兄一時聞者皆稱重孝友而兄顧惑于讒謂父私重財獨厚橫誣洗索惡聲日數至鄉黨咸為不平重泰然推千金產讓之于是鄉黨益多重乃事兄彌恭每承過從饌必親奉轡必親執久之兄乃悟曰有弟若是彼讒者誠小人也吾滋愧矣丁母艱哀毀骨立盡瘁襄事為善益力賑乏卹孤施粟捐軫義所可為輒傾橐從事嘗自謂不克以功名慰其父創立家塾廣搜

異書延名師以課諸子而諸子皆以春秋成名鄢之
由太學生受褒封者自重始崇正兩子率大中丞鄭
二陽立傳子景愈紹愈法愈自有傳

府志孝義
參舊志

國朝

主鳴球字伊璜生而靈敏過目成誦為諸生有名中順
治庚子解元康熙甲辰進士丁未與子曰温同對策
曰温選庶常鳴球授中翰人傳為盛事鳴球賦性尤
孝友明季闖變舉家避難汴城俱陷洪波年甫十三
浮木而出號泣尋嫡母孫氏屍得之槁葬識其處飄

流河北三年 定鼎後赴汴迎母遺骸歸葬故里兄
鳴玉年老而病鳴球服勞奉養各如其意好施與族
黨多所周給遇歲凶疫煮粥施藥行之無倦以日肯
未補官放懷林壑惟詩酒自娛讀書至老不輟所著
有詩文等集藏于家

常啟肩字似之司農長子邑貢生司農解組歸啟肩善
養志以孝稱為人倜儻不羣磊落多大節當時邑宰
恒待之以國士值流寇蔓延地方戒嚴凡旅人迹涉
疑似者多以奸宄寘于法啟肩守西城每有緝獲必


加詳審力言于令釋之所全活甚多晚年課子訓弟子
 子鉉禧與弟翼聖辛丑同成進士人咸謂陰德之報
 梁焄字曰馥廩生彌月卽繼嗣伯父父母歿葬祭盡禮
 三年獨居一室哀毀骨立人稱其孝奮志讀書德行
 文學爲儒林所重撫軍佟公季考閱其文以中州第
 一人目之子城孫銘旂皆庠生以繼志稱

韓永存庠生出繼伯父則愈定省盡禮父遠宦永嘉歲
 時思念飲食必祝親歿葬祭一遵于古事本生父母
 情禮不減處兄弟克盡友愛輕財好義人爭譽之

并庠生年十三父卒躄踊痛哭居喪三年哀毀過禮
 家貧篤學事孀母備極甘旨自食惟藜藿充饑而已
 惜以弱冠卒妻劉以節旌

常鉉祐拔貢生鹽屑子鹽屑素尚義行迎養寡嫂及孀
 姊皆有恩復教姊子登鄉薦鄉黨稱之鉉祐幼繼嗣
 伯父顯印奉養周洽父母死遺二妹于歸後俱極貧
 鉉祐體親心迎其夫婦至家同居數十年生甥及女
 咸爲之婚嫁焉

梁熹字曰晦庠生幼失怙恃奮志讀書族黨有貧不能



婚葬者多周濟期功之親有遺孤無所歸留養之其伯祖太常克從乏嗣停柩于室為營葬其他好施鄉黨亦時被其澤邑令李而侗舉鄉飲大賓

梁埴字撫臣歲貢生御史熙子熙解組歸里三十餘年

瑄朝夕在側承顏順志不少違父歿哀痛盡禮邑令

宋恭貽課士常曰當以梁埴為法贈埴詩有藉君常

樹人倫表之句蓋深重之云年八十一卒以上採乾隆三年儒

學造送忠義節孝入祠冊

王襄字贊伯事繼母以孝聞友愛諸季無間康熙丙午

舉于鄉授汝陽教諭立五社以課士崇實去華文風

大振癸酉分校楚闈所拔皆名下士劉燕祥採訪

劉國祿字君俸明司寇訥五世孫年甫十二父得癱疾

勤奉湯藥寒暑不少離越二年娶妻鄭鄭亦年幼與

祿同志祿父輾轉床第者十四載而事益力及歿躄

踊號泣家雖貧竭力營葬罔不盡禮事母二十九載

歷久不渝撫孤姪如子教之有成食邑餼

劉偉字子長號野石大司寇訥五世孫八歲能誦五經

年十五以第一名入庠母楊氏抱病偉數月不解衣

帶躬親湯藥晝夜無間復告天願減已年以增母壽
 母病尋愈戊午舉于鄉邑令許承澎續修邑志延偉
 總其事書成未梓偉甘貧樂道開館授徒一時鄉薦
 明經多出其門偉家六世科第皆習春秋至偉益精
 著有春秋標旨二卷孫燕貽任教諭續志

鄭坦之字崙愚大中丞二陽孫康熙丁丑拔貢事父以
 孝聞父病侍湯藥衣不解帶者兼旬及歿哀毀逾常
 三年未嘗見笑凡棺殮營葬一準中丞所著禮要嫻
 族嘆為盡禮嘗念父在設立五塋祭典為之整理定

祭品詳儀則續承父志復以祭田所餘周族人之不
 給者子原鑑原銓皆食餼以世其業王復性採訪

王延祐字次亭奉常曰温子賦性醇樸無貴介氣居父
 母喪寢苦塊三日始食三年不飲酒食肉以諸生貢
 太學幼時隨任京師因地震恐懼修省遂志于學著
 述以程朱為宗衣冠古樸有先民風味督學張廷璐
 為立傳

爨興昌字伯侯事親能曲體親心兄弟析居多讓產親
 族有貧不能舉火或無力婚喪者悉力營助晚年嘗

檢篋得欠券二千餘金喟然曰向者有某某曾償我二百餘金皆不納以其為鬻女與典地貲也茲券中豈少其人乎悉焚之雍正九年春歲凶出所積糧四千餘石去糠土減價以售一時稱之子起莘貢生續志

王兆祥字錫極性孝親歿年已逾六旬三年廬墓復于

父塋七里橋廟施茶湯三載前令旌其孝

王芸心採訪

常禧字允怡諸生幼而事親出必告反必面即書館退亦然入庠後親已老矣備極甘旨及歿善繼父志雍正乙卯前令因普廣二堂乏糧勸捐禧聞之慨然曰

此義舉也捐地十二畝給匾以獎

以上手文運採訪

陳孔昭字德一生員克信長子事親先意承志父病奉湯藥晝夜不懈病亟取父糞嘗之垂泪曰味如炒麵恐不能起矣父沒奉繼母終身無缺禮子東銘貢生

彭應光採訪

程本字文輔三歲而孤母魏矢志撫育稍長即知孝母病勤奉湯藥母死哀毀號泣蔬食終身以勤儉起家樂施濟族之孤寡者多依之年七十三卒

王芸心採訪

梁錫類字永子父墀早歿母劉守節撫之錫類幼知好

學事母孝補諸生見文廟樂器多廢失倡捐請修邑
 令命董其事弟錫命早歿遺二女撫如已出養弟婦
 三十年如一日鄆大水民屋多壞且苦饑錫類偕友
 人為木筏載食食之子發濂乙卯拔貢任教諭同
 陳占鰲字龍章諸生父病勤侍湯藥及歿哀毀過禮事
 曾祖母與祖母及母每食備甘旨必親侍于側食畢
 而後去遇大故鰲已幡然猶作孺子啼生平卹族賑
 乏以為樂本府劉湘旌之年七十三卒

王文太科子家赤貧担柴貿易養其父父病篤割左股

肉和葯進病遂愈人以為孝感前令旌之

常思記採訪

軒轅大成字公集孝友樂施廬墓三年每晨以衣掇土
 添墓邑東滾岡水大行旅病涉大成捐金建橋曾拾
 遺金還之尤好義廟宇多所修葺前令張旌其門同
 馬珍世業農性恭謹治家有法同居五世子姪兄弟八
 十餘人悉遵其教敦孝友內外無間言或曰翁何以
 能此珍曰其要在不自私耳

王宗正推小車為業與兄宗孝極友愛兄死唐縣宗正
 走百里負兄骸骨歸賣其小車為營葬

謝裕如字綽然諸生五世同居力行孝友男婦八十餘口均其苦樂一門之內和氣霽然四方競傳以為勸

以上見中州彰善錄

李盡孝農家子貧無立錐幼隨父母走大名府未幾父死哭葬于郊織席編蒲以養其母奉母之江南母又死亦寄葬之熒熒一身歸鄆陵日勤操作不事婚娶二十餘年積錢十餘貫躬負父母骸骨歸合葬故土泣語人曰吾事畢矣後二年卒蓋其終身盡孝鄉人遂以盡孝呼之

梁英楠採訪

李養正字聖功貢生苦志讀書貧不自給嘗食草實而讀不倦繼晷無油代以香後食餼以明經授內黃教諭能教其子弟生平事親最孝父病不能舉箸每食必親喂凡有所餘皆自食涕洟之污不知也以病卒

于官 于文運採訪

陳儉字惟一國學生父卧病醫藥不愈儉晝夜未嘗離一日嘗糞覺味淡無氣輒垂泪不止父歿悲哀過甚泪沾衣袖家人視之皆血也

彭應光採訪

金其成國學生嗣叔應璽為子事父母能承歡母病嘗

糞進藥而母病卽愈閭里咸謂孝感兄其章析居已久有不給任其來取無難色歿後子孫猶遵爲家法

陳兆鳳
採訪

彭謨字舜若奉親以孝聞事繼母尤得其歡心母稍不悅卽長跪受教意解方起好施與嘗修許家坡石橋兩座在本村施義漿二十餘年施棺施藥奉母命爲之子應兆癸酉拔貢

趙辛升字西成諸生事親敬愛兼篤其父病曾爲嘗糞哭泣治喪無缺禮

邵世則世訓自高祖下及子孫已同居七世門庭雍睦

雖異姓聚處亦皆和氣相迎

以上陳東
銘採訪

葛其模字子正諸生事父極孝友愛其弟及同堂諸弟親睦無間手訂葛氏族譜睦族之誼本於天性鄉人

稱之

張休采
採訪

李耀先諸生父歿廬墓三年彪岡河橋壞嘗獨力重修鄉人公舉有司給獎

徐德才家貧竭力事親母病嘗糞知病亟獨跪霜雪中禱天願以身代母病痊人爲孝感邑令旌之

蘇士秀字俊升邑廩生性孝友母早亡日夜飲泣父前
勉爲笑容每讀書至父母在父母俱存章卽涕下父
昂增廣生鰥居三十年秀順承父志無不如意家極
貧待兄有禮撫幼姪如已出邑人舉其善行有司旌
之

張繩武與弟樂天皆武庠性孝母患癱兄弟衣不解帶

夜呼卽起如是者六年

馬敬生
採訪

忠義

晉

庾珉字子琚

子峻

性淳和好學行已忠恕少歷散騎常侍

本國中正侍中封長岑男懷帝之歿劉元海也珉從
在平陽元海大會因使帝行酒珉不勝悲憤再拜上
酒因大號哭賊惡之會有告珉及王儁等謀應劉琨
者元海因圖弑逆珉等並遇害初洛陽之未陷也珉
爲侍中直于省內謂同僚許遐曰世路如此禍難將
及吾當死乎此屋耳及是竟不免焉太元末追謚曰

貞

見晉書庾峻傳 省志入忠烈府志同舊志列名德

庾敬字子嵩

峻子

長不滿七尺而腰帶十圍雅有遠韻為

陳留相未嘗以事嬰心從容酣暢寄適而已處眾人中居然獨立嘗讀老莊曰正與人意闇同太尉王衍雅重之敬見王室多難終知嬰禍乃著意賦以豁情衍賈誼之服鳥也從子亮見賦問曰若有意也非賦所畫若無意也復何所賦答曰在有無之間耳遷吏部郎是時天下多故機變屢起敬常靜默無為叅東海王越太傅軍事轉軍諮祭酒時越府多僞異敬在

其中常自神王豫州牧長史河南郭象善老莊時人以爲王弼之亞敬甚知之每曰郭子玄何必滅庾子嵩象後爲太傅主簿任事專勢敬謂象曰卿自是當世大才我疇昔之意都已盡矣敬有重名爲縉紳所推而聚斂積實談者譏之都官從事溫嶠奏之敬更器嶠曰嶠森森如千丈松雖礪斲多節施之大厦有棟梁之用時劉輿見任於越人士多爲所構惟敬縱心事外無迹可問後以其性儉家富說越令就換錢千萬冀其有吝因此可乘越於衆坐中問於敬而敬

乃頽然已醉憤墮几上以頭就穿取徐答云下官家
 有二千萬隨公所取矣輿於是乃服越甚悅因曰不
 可以小人之慮度君子之心王衍不與敬交敬卿之
 不置衍曰君不得為耳敬曰卿自君我我自卿卿我
 自用我家法卿自用卿家法衍甚奇之石勒之亂與
 衍俱被害時年五十

見晉書庾峻傳 省志入 忠烈府志同舊志列文學

明

陳爾璜邑廩生明季流賊圍鄆璜與士民分守西城及
 城破璜被執欲降之璜厲色云我陳爾璜也寧殺身

焉肯從賊罵不絕口賊怒殺之璜乏嗣其堂叔陳銘

為收尸以葬

常思記 採訪

劉桂茂倉頭村人與兄桂卿素篤友愛明季流寇作亂
 土賊蜂起詔鄉民各得以立寨保護于是邑之倉頭
 陶城橫里蔣家李家五村各築土寨相誓救援癸未
 孟夏望賊攻陶城四寨赴援桂卿桂茂偕往戰敗桂
 茂奔至橫里聞兄被虜復奮勇轉救鄉人感其義輔
 者三十餘人桂茂率先逼賊見兄尸痛哭曰兄既死
 吾豈獨生直薄賊營傷賊數十人賊圍之弓弩齊發

遂被害賊去家人收尸葬于倉頭之南里皆稱為劉

義士墓云子永裔年十四入邑庠

王芸心採訪

程天爵貢生補官周鼎辭祿養母崇正壬申遇賊不屈

死監司錄其子侑為庠生

見府志補

儒林

自遷固作儒林傳後世史家宗之然非有功於經學者不濫入焉張興見後漢書尹宙亦以博通書傳稱故特表儒林一門以待後之興起者志儒林

漢

張興字君上潁川鄆陵人也習梁邱易以教授建武中舉孝廉為郎謝病去復歸聚徒後辟司徒馮勤府勤舉為孝廉稍遷博士永平初遷侍中祭酒十年拜太子少傅顯宗數訪問經術既而聲稱著聞弟子自遠

至者著錄且萬人為梁邱家宗著於籍錄十四年卒
于官子魴傳興業位至張掖屬國都尉

府志入列傳
舊志列經術

後漢書儒林
傳省志同

尹宙字周南潁川鄆陵人東平相之玄孫會稽太守之
曾孫富波侯相之孫守長社令之元子也君體溫良
恭儉之德篤親九族恂恂于鄉黨交朋會友貞賢是
與治公羊春秋經博通書傳仕郡歷主簿督郵五官
掾功曹守景陽令州辟從事忠以處事清以厲時京
夏歸德宰司嘉焉熹平六年四月卒年六十有二鄉

人論功敘實勒石記之文載金石志

見漢碑
省志入儒林府志入

列傳舊志
列名德

明

張易洪武間以通經儒士膺薦累官戶部侍郎直道不
阿司會允當名載大誥編中雖幾得罪終不廢賢
杜懋字太勉少有大志精于易義天順甲申會試第八
名進士刻傳經文甚多選翰林院庶吉士肄業史館
未幾卒

舊志

國朝

韓逢吉字旋元歲貢生父早歿母梁氏教以義方數歲
嬉戲母側言動舉止儼若成人及長苦志篤學以斯
道爲己任鄢庠士多從之遊晚年于舍旁建一草亭
日坐其中潛玩先儒所註經傳每得精奧卽與遠近
請謁者講解終日不懈既歿門人築室治喪凡數十
家稱之曰西齋先生所著有四書本旨周易易簡註
禮記輯要續志列
經術

文苑

人生三不朽而立言居立德立功之次此文苑所
由傳也鄢之文學如庾氏五人無忝矣唐宋以來
間亦不乏我

朝文治日隆彬彬輩出山川清淑之氣其有待而興者
歟志文苑

晉

庾闡字仲初潁川鄢陵人也祖輝安北長史父東以勇
力聞武帝時有西域健將趨捷無敵晉人莫敢與校

帝募勇士惟東應選遂撲殺之名震殊俗闡好學九
 歲能屬文少隨舅孫氏過江母隨兄肇為安樂長史
 在項城永嘉末為石勒所陷闡母亦歿闡不櫛沐不
 婚宦絕酒肉二十年鄉親稱之州舉秀才元帝為晉
 王辟之皆不行後為太宰西陽王羨掾累遷尚書郎
 蘇峻之難闡出奔郗鑒為司空叅軍峻平以功賜爵
 吉陽縣男拜彭城內史鑒復請為從事中郎尋召為
 散騎侍郎領大著作項之出補零陵太守入湘川為
 文以弔賈誼文士稱之後以疾徵拜給事中復領著

作吳國內史虞潭為太伯立碑闡製其文又作揚都
 賦皆為世所重年五十四卒諡曰貞所著詩賦銘頌
 十卷行于世子肅之亦有文藻著稱歷給事中相府
 記室至湘東太守太元中卒

晉書文苑傳 省志入
文苑府志入列傳舊志

同

南北朝

庾徽之潁川鄢陵人也仕宋官至御史中丞以文才見
 重孝武帝時顏峻章頗懷怨憤言人主得失上乃使
 徽之奏免子漪齊邵陵王記室亦有文名漪子仲容

南史庾悅顏延之
兩傳 舊志闕

庾仲容字子仲穎川鄢陵人也晉司空冰六代孫祖徽之宋御史中丞父漪齊邵陵王記室仲容幼孤爲叔父泳所養旣長杜絕人事專精篤學晝夜手不輟卷初爲安西法曹行參軍泳時已貴顯吏部尚書徐勉擬泳子晏嬰爲宮僚泳垂泣曰兄子幼孤人才粗可願以晏嬰所忝廼用之勉許焉因轉仲容爲太子舍人遷安成王主簿時平原劉孝標亦爲府佐竝以彊學爲王所禮接遷晉安功曹史歷爲永康錢塘武康

令治縣竝無異績多被劾久之除安成王中記室當出隨府皇太子以舊恩特降餞宴賜詩曰孫生陟陽道吳子朝歌縣未若樊林舉置酒臨華殿時輩榮之遷安西武陵王諮議參軍除尚書左丞坐推糾不直免仲容博學少有盛名頗任氣使酒好危言高論士友以此少之唯與王籍謝幾卿情好相得二人時亦不調遂相追隨誕縱酣飲不復持檢操久之復爲諮議參軍出爲黟縣令及太清亂客遊會稽遇疾卒時年七十四仲容抄諸子書三十卷衆家地理書二十

卷列女傳三卷文集二十卷竝行於世

梁書文學傳
府志入列

傳省志列文
學舊志同

庾持字元德潁川鄆陵人也祖佩玉宋長沙內史父沙彌梁長城令持少孤性至孝居父憂過禮篤志好學尤善書記以才藝聞解褐梁南平王國左常侍輕車河東王府行參軍兼尚書郎等而爲真出爲安吉令遷東邵陵王府限外記室兼建康令天監初世祖與持有舊及世祖爲吳興太守以持爲郡丞兼掌書翰自是常依文帝文帝尅張彪鎮會稽又令持監臨海

郡以貪縱失民和爲山盜所劫幽執十旬世祖遣劉澄討平之持乃獲免高祖受禪授安東臨川王府諮議參軍天嘉初遷尚書左丞以預長城之功封崇德縣子邑三百戶拜封之日請令史爲客受其餉遺世祖怒之因坐免尋爲宣惠始興王府諮議參軍除臨安令坐杖殺縣民免封遷爲給事黃門侍郎除稜威將軍鹽官令光大元年遷秘書監知國史事又爲少府卿領羽林監遷大中大夫領步兵校尉太建元年卒時年六十二詔贈光祿大夫持善字書每屬辭好

為奇字文士亦以此譏之有集十卷子自直在隋文

苑傳 陳書文學傳
舊志闕

隋

庾自直潁川鄆陵人也父持陳羽林監自直少好學沉
靜寡欲仕陳歷豫章王府外兵參軍宣惠記室陳亡
入關不得調晉王廣聞之引為學士大業初授著作
佐郎自直解屬文於五言詩尤善性恭慎不妄交遊
特為帝所愛帝有篇章必先示自直令其詆訶自直
所難帝輒改之或至于再三俟其稱善然後方出其

見親禮如此後以本官知起居舍人事化及作逆以
之北上自載露車中感激發病卒有文集十卷行於

世 隋書文學傳 省府
志入列傳舊志闕

唐

崔知悌知温兄也素有文名其文見文苑英華以薦累
官至中書侍郎嘗與戴至德郝處俊李敬立等同賜
飛白贊而知悌尤以忠勤見表遷尚書左丞以軍功
終進戶部尚書所著有集五卷法例二卷產圖一卷

唐書崔知温
傳 舊志闕

宋

崔公孺字象之立次子也性渾厚有高識博學善屬文始以父任補將作監主簿耻在廕籍欲自取進士既不第益究覽經史百家無不得其淵妙歷監許州商稅知翟縣事累遷比部員外郎卒公孺篤倫庇宗治民清約慶歷中詣闕上書論十事引據深切韓琦執政用監司有非其人者公孺曰公居陶鎔之地宜以造化爲心造化以蛇虎害人故置蛇于藪澤置虎于山林公今乃置于通衢使爲民害可乎琦甚敬之素

樂閒退屏居葆光亭以文酒自娛與相知者訂林泉

約願與者籍記之子二振孫保孫

韓魏公安陽集叅舊志府志入列

傳舊志列文學

明

王璣字幼齊少多藻思能詩正德間劉齊破鄆陵璣母傅孺人老而病璣守之不忍去賊遂以刀傷其面人稱其孝嘉靖丁酉年四十三始中鄉試授深澤縣知縣四十日卒大中丞陳棐誌其墓以其詩比梅聖俞深悼惜之所著有梅岩集

舊志列文學

劉遵字翁高大司寇璟之孫訢之子博學有志操叔父
訢亟稱之以貢生謁銓作北征賦數千言名動京師
與王祖嫡方九功李袞李蔭友善時隆慶二年神宗
初出閣讀書詔選老成耆碩之儒伴讀東宮祖嫡等
力薦遵江陵疑遵與新鄭有親不用就吏部考授畧
陽主簿旣之官稱引古義不肯以下吏自待居四十
日棄歸優游林壑閉戶著述邑令陳登雲錢夢得嘗
造請焉所著有石孔山人集畧石孔山人四六稿唐

詩類選行于世

舊志列
文學

劉巡字豫田大司寇訢之子以父廕初任左府都事陞
順天府治中時高文襄公當國命巡以治中攝京兆
事庖苴不入干謁不事久之文襄罷巡獨亡恙人服
其高識陞南康太守日載琴酒往來匡廬間尋解綬
歸就東郊營菟裘曰三花圃蕭條高寄不入城市近
三十載巡博通遠覽于學問無不探索而尤精于琴
家人于其沒也嘗聞所居時時有琴聲宛如其生云
所著有竹素園諸集又嘗效編年法重修邑志未成
卒長子好生能繼其學于六壬諸術尤精且醇正謹

恪鄉黨推為善士

舊志列文學

梁為虹字伯飛太常克從孫尚書廷棟子也性敏捷幼有神童之目下筆千言可立就文義豔發擅一時之譽隨祖避寇汴城與汴水之難兄為舟亦有文名與為虹同載復社姓氏錄生平著述甚多皆付洪流中至今傳者猶惜之

梁廷棟傳舊志闕

蘇宇字昭六運司起維子崇正間拔貢生為人倜儻有大志文名藉甚尤耽于吟詠性喜靜終歲下帷讀書家人言事者立門外音響相接而已時值明季有所

感觸悉寓之于詩遨遊燕趙間不得意益肆其力于古以攻苦卒年三十四子岌岌著有中曲山房詩集兵燹後盡散失老僕石材頗識字曾侍抄書暗有所記追錄之得一編後泗上白奪山人避居伏村改名翁深其子岌持詩商定大為山人所激賞序刻傳之岌字敬伯岌字和仲皆邑貢生能讀父書者咸以訓導終

採白奪山人集補

國朝

劉佑字伯啟順治己亥進士太守賁卿之孫清河令漢

蔡子也賦性明敏苦志力學掇甲科益肆力于詩古文詞任臨洮府同知才識鍊達政暇卽潛心學問著有詩文稿各若干卷温陵周廷鑑極推服之序梓以行世

增

鄭蕃字公靜大中丞二陽長子中順治辛卯舉人幼端重不苟嘻笑弱冠入庠試輒高等隨任德安遊于忠烈楊公之門忠烈被璫禍蕃周旋患難間厚卹其家戊寅兵荒蕃出粟賑濟鄉里全活甚衆居皖江與復社諸名士遊文學益進修葺學如圃爲藏修地怡親

課子不干外事遭中丞喪哀毀盡禮三年如一日中丞惠及閩里鄉人建報德祠祠僧無養膳蕃以已腴田百畝施之他如周卹親族扶危濟困難以悉舉壽八十三終生平以紹述爲志編輯中丞益樓集鄭氏家乘仁壽堂醫方評注自著鄱邑雜誌藝文志確園集行于世

韓程愈字智度生而警敏好學能文章有名巽序由明經授瓊山令教養並興一洗明季頽敗之習三年賦歸閉戶讀書翹然以古人自命對宗族鄉黨惟以德

行文學為勗勉遇人有過面責不少寬假晚年創置祭田歲時躬率子弟致祭先靈終始不怠嘗續修邑

志所著有白松樓集

續志

韓則愈字叔夜天資英異倜儻不羈弱冠嫺熟制義兼通詩古文辭由貢士授永嘉知縣以文章飾吏治不

以催科廢絃歌三年解組歸益潛心于著述嘗分纂

邑志著有秋巖集藏于家

續志

常錫胤字耆之號御冷司農次子少好學聲名藉甚順治戊子舉于鄉歷中書山東河道先是開歸陳許四

府每歲帮夫二千名士民苦之錫胤極力詳請始免

內轉山西道御史博通掩雅于書無所不讀前代典

故鉅細悉諳凡朝中議禮恒下問輒詳明指陳衆皆

推服後巡視兩浙鹽課被議去官著有禮記便蒙徽

省別錄行世

于師渠採訪

錢見龍字乘六學子學生平好義年八十九以鄉飲賓終見龍弱冠以能文見賞于梁大司馬由是益勤學

定鼎後食餼以歲貢授濟源訓導惟讀書致用為實務

濟源飢勸邑侯急放賑條其法以上民多被其利後

告歸著有省園錄

劉燕祥採訪

王曰良字子易由明經任新安教諭歷。郝縣新蔡陞汝
 寧教授卒于官所至名檢自勵興賢育才如關琇王
 桂張射標呂謙恒輩先後中式聯袂登朝更于新蔡
 捐俸置學田二百餘畝去後多泐石志感康熙庚午
 洛中饑新安士就食于良者數十家丁艱歸于村中
 設立義塾以教鄉人之貧不能讀者至今頌之續志
 常鉉禡字九疇侍郎自裕孫大廷尉翼聖子幼穎異弱
 冠食餼康熙癸酉拔貢生隨父任至浙江著制義數

飛集爲鬲上仇兆鰲所推重序而傳之好吟咏著越
 遊草又訂正小學忠孝經行世康熙四十年以薦舉
 任內閣中書歷刑部主事監督通州中南倉三年期
 滿陞員外郎未赴任卒于官生平好義嘗立書院于
 小岡之淇園以教來學戚里有婚喪之不給者力濟
 之任監督時蒙

恩旨賜

御書尤異數也

于師渠採訪

王延禧字燕亭號恒齋由丙寅選拔授確山教諭性剛

方不隨世趨學有田二十餘畝歲收所入卽以建書院未嘗少私一時寒士肄業者多裨益焉

蘇瑛字懋如嚴毅端方刻意礪學弱冠食餼試輒冠軍以數音未售教授生徒娓娓不倦務期其心解乃已以故從遊者甚衆邑庠知名大半出其門以明經授新蔡訓導立科條以訓士先品行而後文藝督學于公極賞之告老歸年八十八卒

劉樞字維斗偉子年十八食邑餼雖簞瓢屢空而讀書自樂未嘗有戚戚容舌耕自給好獎進後學以歲薦

任商城訓導商士被其教者羣切立雪之頌六年卒于官子燕貽字繹堂號牧齋少就庭訓爲廩生名藉甚癸卯鄉薦壬子爲山西同考官所拔七人解元殿元悉出其門後授商城教諭先是樞司訓時卽隨任與商士相切磨及之任相得益歡佩其教澤者皆彬彬有古風俸滿授禹城縣知縣仍改教職補唐邑教諭涖任十八年修學宮營學署廣學田考樂器皆悉心經理唐人士多被其教陞河南府教授到任數月而卒年七十三

張濟字于陵號鶴洲喜讀書善穎悟弱冠入庠益自勤
 苦旋食餼四方之士多從之遊出繼胞叔問安視膳
 不啻所生性愛花竹手自種植日與一二知己飲酒
 賦詩前令高其行時造廬講論然未嘗以事干謁年
 六十登歲薦授永城司訓永士翕然歸之
以上劉燕祥採訪
 扈光遇字廣生幼工文藝一時推為祭酒中康熙乙酉
 舉人部銓涑水令甫出都奉


詔引 見奏對稱

旨授知安州抵州勤于撫字值大旱潔誠祈禱至于涕

泣甘露立霈境內多積水地幾至千頃民或因旱樹
 藝熟則官取其賦為常例歲可納麥千餘石公堅不
 受曰是勞吾民力而獲者吾何利焉上官聞而嘉之

歷四載以疾終于官 王芸心採訪

曹哲字又曾拔貢文名為一時冠雍正甲辰中副榜人
 咸惜之生平不履城市杜門讀書終日端坐如對大
 賓博覽羣書至老不倦年八十餘諷詠之聲猶達戶
 外子汝楫字作舟亦貢生學行庶能繼其父者 彭應光採訪
 王蘊秀字勝選穎捷過人十歲以能文名入庠即冠軍



性好古文詞遂絕意仕進家居事親承顏備極甘旨
受徒講業多所成就如張素志蘇帝輔爨剛克張修
來皆出其門前令姜聘修邑志其中咸取折衷焉以
壽終子芸心孫品端皆諸生

續志

陳鐸宣字敬半棊曾孫邑諸生喜讀書沉浸古文四方
受業多名士御史梁熙重其學延爲經師居鄉以忠
厚稱其弟子陳生輝字超凡亦邑庠授徒講解不輟
時巡撫尹公會一頒朱子白鹿洞教條令學師會講
生輝敷陳剴切聽者忘倦太守朱公繡聞而獎之

